



史字不列號 雜史

明李遜之撰



崇禎朝紀事四卷

從德化李氏  
藏本鈔出



崇禎紀事曾刊入荆船中而佚去兩卷此完本蓋  
在楚中袁氏今歸德化李編修家因借歸按完佚史  
本也李遜之自稱江上遺民蓋江陰人又卷二末葉錄  
先忠毅致明史兩李忠毅其前考為李翰臣大同人與  
崇禎朝不相及此則李仲達應昇子也明史本傳  
不云子遜之因此亦之以補本傳之缺知忠臣有後也  
光緒辛卯四月四日識于讀五千卷書室

崇禎朝記事卷一

江上遺民李遜之輯

毅宗烈皇帝為光廟第五子母選侍劉氏後追謚為孝純太后  
萬曆三十八年庚戌十二月二十四日卯時生於東宮孝純早  
逝撫育於李莊妃天啟二年九月册封為信王七年二月就外  
邸成婚册妃周氏是為烈皇后后為兵馬司周奎之女奎係蘇  
州府長洲縣人後封嘉定伯熹廟病亟時魏璫方張盛中外危  
慄上在信邸為魏璫疑忌常稱疾不朝謁至是召入見諭以吾  
弟當為堯舜上懼不敢當但言陛下為此語臣應萬死熹廟再  
以善視中宮為託又言忠賢宜委用上益懼求出至八月甲寅

日熹廟已晏駕諸奸秘不傳翌日凶聞彰露始宣皇后懿旨告外逆璫遣涂文輔等迎入宮上自危甚袖食物以進不敢食宮中物也是時羣臣無得見上者上秉燭獨坐久之見一闥攜劍過取視之留置几上許給以賞聞巡邏聲勞苦之問左右欲給以酒食安從取乎侍者對宜問之光祿寺傳令旨取給之歡聲如雷以二十四日即皇帝位於中極殿受百官朝朝時忽天諭免召買香燭節省三萬餘兩加恩文武軍民人等賞賚守邊官軍諭內閣動支戶部太倉銀三十萬兩兵部太僕寺馬價銀三十萬兩工部二十萬兩順天府按括稅契等項銀一萬兩各運給發

內閣奉上傳凡本內遇天地祖宗列后字樣俱要出格朕不敢與天地祖宗並傳旨遵行

上一日御便殿閱章奏聞香烟心動疑之出步堦城間乃定詢問內官此自何至曰宮中舊方上叱毀之勿復進太息曰皇考皇兄皆為此悞也

九月甲子朔太監魏忠賢乞辭廠務不允奉聖夫人客氏淮出外宅給甯國公魏良卿安平伯魏鵬翼鈇券太監李永貞疏病淮回籍調理

客氏既奉旨出宮於五更衰服赴梓宮前出一小函用黃色龍袱包裹先帝胎髮痘痂及累年剃髮落齒指甲等焚化痛

哭而去。後奉旨籍其家。命太監王文政嚴訊之。得宮人有娠者八人。蓋出入掖庭。多攜其家侍媵。莫如呂不韋李園事也。上大怒。命赴浣衣局掠死。後仍僂屍凌遲。子侯國興伏誅。客光先客璠楊六奇等。永成忠賢肆惡。皆與客氏同謀成之。其危中宮害裕妃成妃。用王體乾殺王安。皆客氏之造意也。光先璠皆客氏兄子。楊六奇忠賢之壻。

上初即位。所以優禮客魏者。一如熹廟。而潛邸承奉。盡易以新。御入內供事。其李朝欽裴有聲王秉躬吳光承談敬裴芳等。次第准其乞休。逆賢羽翼剪除一空。復散遣家下。然後黜逐逆賢。肘掖太奸。不動聲色。潛移默奪。非天縱神武。何以有此。

四大朝。廷臣俱用朝衣朝服。內閣則否。惟歲除祭中霽之神。司禮監掌印代行祭禮。奏請祭服服之。大朝止磕頭呼萬歲而已。逆賢擅政。凡遇大朝。與王體乾等下至牌子。俱僭用朝衣冠於乾清宮大殿內。炤外庭儀制。行慶賀山呼禮。贊禮內閣。一如鴻臚班首。亦致詞焉。後魏良卿晉封逆賢。改戴貂蟬冠。位在王體乾上。烈皇登極。逆賢欲仍炤熹廟行禮。繼憚上英明。止用本等服色。同衆叩頭呼萬歲。

御史楊維垣疏論。崔呈秀依附魏忠賢。立志卑污。居身穢濁。上答以諸臣俱經先帝簡擢。不得妄詆。

御史賈繼春參崔呈秀。以聽勘御史未及二年。驟陞宮保。賣官

嚮爵貪淫穢迹不可枚舉田吉以殿試而被懷挾之參瓦全已  
幸乃二載曹郎而尚書極品叨名器如承蜩單明詡踰期主政  
而督撫侍郎取節鉞如拾芥又笑破士林之口應聽自裁工部  
主事陸澄源上言四事一正士習比來士氣漸卑惟以稱功頌  
德為事如厥臣魏忠賢奏疏不書姓名盡廢君前臣名之禮祝  
釐遍於海內奔走狂於域中士風之卑莫此為甚一糾官邪如  
尚書崔呈秀貪橫無恥臺臣雖悉其槩其惡實罄竹難書一安  
民生立初之法爰書未定而命已斃厥衛深文株連蔓引慘酷  
不忍言一足國用今之勲蔭充塞滿路祿費不支又如忠賢生  
祠在在創立費不下百萬及今變賣尚可得數十萬金兵部主

事錢元愨疏言巨奸崔呈秀雖已鋤去然呈秀之惡皆緣藉忠  
賢之權勢忠賢以梟獍之姿供綴衣之役先帝念其服勤假以  
事權羣小蟻附稱功頌德遍滿天下幾如王莽之妄引符命列  
爵三等昇於乳臭幾如梁冀之一門五侯偏列私人分布要  
津幾如王衍之狡兔三窟與珍輦寶藏積肅甯幾如董卓之鄙  
郎自固動輒稱旨箝制百僚幾如趙高之指鹿為馬誅鋤士類  
傷殘元氣幾如節甫之鉤黨株連陰養死士陳兵自衛幾如桓  
溫之辟後置人廣開告訐道路以目幾如則天之羅箱吉網天  
佑國家誕啟聖明然羽翼未除陰謀未散可漫馬不加意乎至  
魏良卿輩既非開國之勲又非從龍之寵安得玷茲茅土又如

告訐獲賞之張體乾煅煉驟貴之楊寰夫頭乘轎之張凌雲委  
官開棍之陳大同號稱大兒之田爾畊甯國契友之白太始等  
凡為忠賢之爪牙鷹犬俱宜明其罪或殛或放則奸黨肅清矣  
御史吳尚默疏言賊臣之身已去賊臣之惡未暴呈秀鬻身與  
援之門入賓閣寺之幕不顧笑罵稱功頌德天下幾不知廉恥  
立馬之呼屢斥朝陽之音罕聞天下幾不知有名節疏揭一入  
家籍沒而身齷粉人人重足天下幾不知有身家將作何事乃  
與奪情天下幾不知有倫理都察一院而設四憲臣左都一秩  
而設兩獨座天下幾不知有名位甚者先帝易箚將及乃連章  
累牘頒爵賞而列封廕羣臣謝恩之日即先帝賓天之日天下

幾不知有改革之大故論及此而賊臣之罪案定廠臣魏忠賢  
之罪案亦可定矣貢士錢嘉徵疏劾魏忠賢十大罪一曰並帝  
內外封章必先關白稱功頌德上配先帝及奉俞旨必曰朕與  
廠臣二曰後后皇親張國紀未罹不赦之條恨皇后當御前面  
折逆奸遂羅織國紀欲置之死幾危中宮三曰弄兵祖宗朝不  
聞有內操之制忠賢外脅臣民內逼宮闈操刀厲刃砲石雷擊  
深可寒心四曰無祖二祖列宗高皇垂訓中涓不許干預朝政  
乃忠賢於軍國重事一手障天凡邊腹重地漕運咽喉多置腹  
心意欲何為五曰剋削藩封三王之國莊田賜賚甚薄而忠賢  
封公侯伯之土田膏腴萬頃六曰無聖先師為萬世名教之主

忠賢何人敢建祠太學之側。七曰濫爵。古制非軍功不侯。忠賢有何功績而襲上公之封。八曰邀邊功。遼左失陷未恢寸土而封侯。封伯。聯鑣冒賞。九曰傷民財。祠宇遍天下。糜費金錢萬萬。敲骨剝髓。孰非小民之脂膏。十曰褻名器。制科取士。慎重關防。忠賢所私。崔呈秀之子鐸。目不識丁。竟玷賢書。疏入俱報聞。先是已准。崔呈秀回籍守制。同時奪情者。又有工部尚書李養德。延延縵巡撫朱童蒙。俱准丁憂去。忠賢再疏引疾求退。准回私宅調理。甯國公魏良卿改錦衣衛指揮使。東安侯魏良棟改指揮。同知安平伯魏鵬翼改指揮僉事。尋有旨安置忠賢于鳳陽。安置徐應元于顯陵。應元故信邸承奉。以從龍陞司禮。得忠賢賄。

為之左右。上知之。故并得罪。

十一月初四日。諭兵部逆惡魏忠賢。擅竊國柄。蠹盜內帑。陷誣忠直。草菅多命。本當肆市。以雪衆冤。姑從輕降。發鳳陽。豈巨惡不思自改。輒敢將素蓄亡命之徒。身帶凶刃。環擁隨衛。勢若叛然。朕心甚惡。着錦衣衛即差的當官。旗前去扭解。押赴彼處交割明白。其經過地方。各該督撫等官。多撥官兵。沿途護送。所有跟隨羣奸。即擒拿具奏。勿得縱容遺患。時旂官方出京。忠賢至阜城縣。聞信。即自縊於飯店中。其名下隨身用事李朝欽。同縊死焉。崔呈秀亦報縊死于家。旋奉旨。各犯家產俱籍沒入官。各處生祠。盡行拆毀。變價解京。其忠賢在京原賜第一所。命不必

變賣留侯東西底定以賜有功之臣榜曰策勳府

夏允彝曰烈皇不動聲色逐元兇處奸黨宗社再安旁無一人之助較之世宗為更難時在朝皆奄黨莫發其奸維垣首糾呈秀始自相搗貳然以璫仍不敢致譏澄源元愨乃直指璫罪至嘉徵所言更詳盡璫不勝憤哭訴于上愈觸上怒即放之出至中途偵知上必重處遂自縊死呈秀列姬妾并羅列珍異酒器縱飲飲一杯即擲壞之飲已自盡天地再辟皆上獨斷也嘉徵循循大雅人以貢為縣令元愨擢司銓澄源屢與東林反唇所行多不簡以京察錮之為善不卒惜哉楊維垣又疏參魏良卿奉旨逆孽魏良卿法當籍沒着内外官

原評云江彬伏誅在世宗  
即位前豈堪以擬若云較  
武宗之楊劉瑾者更難  
斯得之矣

將有名人犯拘究僧浴光嚴緝必獲其原籍肅甯家產撫按嚴加封固查明具奏

當逆璫盛時曾以十萬金構一佛刹延浴光為主僧璫既敗平時往來者俱絕迹矣浴光獨延之一飯俄而維垣參疏詞及浴光人盡為危之浴光曰吾不出無以安此法屬挺身赴京維垣見之大驚曰不意即師業上疏矣奈何前此維垣曾求光荐引于璫光卻之至是色沮恐其吐實光殊無此意也夫以出家學道之人而受逆璫供養其人固無足取然視維垣輩身列衣冠而前後反覆始則鑽穴呈身繼則參論以博名高其人之賢不肖相去又何哉

刑部為遵旨會議事奉旨逆惡魏忠賢掃除廝役憑藉寵靈睥睨宮闈荼毒良善非開國而忘分茅土逼至尊而自命尚公盜帑弄兵陰謀不軌逆婦客氏傳遞消息把持內外崔呈秀委身奸閹無君無親明攘威福之權大開縉紳之禍無將之誅自有常刑既會議明確着行原籍忠賢於河間府僂屍凌遲呈秀於薊州戮屍斬首仍將爰書刊布中外魏志德等俱發煙瘴地面永遠充軍 罷蘇杭織造諭曰封疆多事征輸繁重朕甚憫焉不忍以衣被組綉之工重因此一方民俟東南底定之日方行開造以稱朕敬天恤民之意 撤回各邊鎮守內官諭兵部曰軍旅大事必事權一而後號令行矧宦官觀兵古來有戒今于各鎮

守內官盡行撤回一切相度機宜約束吏士無事修備有事卻敵俱聽督撫便宜調度無復委任不專體統相軋各督撫諸臣及大小將領務殫竭忠蓋以副朕懷

諭吏部魏忠賢崔呈秀天刑已殛臣民之忿稍舒而詔獄遊魂猶然鬱錮含冤未伸着部院并九卿科道將已前斥害諸臣從公酌議採擇官評有非法禁斃情最可憫者應褒贈即與褒贈應卹廕即與卹廕其削奪牽連者應復官即與復官應起用即與起用有身故捏贓攤即給家屬波累羈囚者應開釋即與開釋勿致久淹傷朕好生之心至元年三月吏部始以死事諸臣列名上請贈卹有加 疏詳載於後

刑部奉旨、敝衛深文、附會鍛鍊、朕深為痛恨、耿如杞着與開復原職、胡士容、李柱明、俱改擬發落、方震孺、惠世揚、着九卿科道會議、耿以不拜逆祠得罪、胡任薊州兵備、為崔呈秀所陷、李任戶部管倉、誣以盜米被獲、逆璫以此叙功、方以封疆、惠以移宮、皆誣坐大辟、至是俱得釋、而部院初猶擬方、惠二人改斬、為戍、再擬始復官起用、云如杞疏言、撫臣劉詔上建祠疏、怪臣不肯呈詳、乃取忠賢像懸之喜峰、見者俱五拜三叩頭、呼九千歲、臣見其像、冕旒也、半揖而行、詔即馳報忠賢、參臣逮問矣、臣入鎮、鎮撫司許顯純酷刑所加、甚於盜賊、反叛、懸坐贓六千三百兩、家資變盡、親友代完、乃得送刑部、問成大辟、押赴市曹者、日日

有聞、幸遇皇上出臣於獄、准復原職、乞容臣回籍調理、奉旨着即銓補優缺、以旌直氣、不必陳請、方震孺亦具疏陳被誣始末、畧云、縉紳之禍、至臣等而極、今既荷雨露之恩、宜永銷報復之念、若纔作藩籬之因、便又種園扉之果、願以之為被罪諸人規、既遇聖主、攀龍鳳者、建豎固奇、狎鷗鷺者、夢魂亦穩、假使逆璫不遭天譴、即獲伏空山、得安枕乎、又願以之為廢棄諸臣規、猶有請焉、逆璫秉政、最喜深文、經敝衛者、冤苦固多、即不經敝衛者、冤苦亦復不少、且恩詔減等、齊民得之、猶易、縉紳得之、反難、臣在獄、與諸臣累言、倘異日蒙生、必以此情控于皇上、今既邀高厚、敢負此心哉、乞勅下法司、從公盡數、公審一番、此又臣附

於工瞽芻蕘之後者也

監生胡煥猷疏論大學士黃立極施鳳來張瑞圖李國樞當忠賢專擅揣摩意旨專事逢迎省直建祠各撰碑稱頌宜急罷去并糾各撫按之請建祠者奉旨下刑部問刑部侍郎李若桂輒引卧碑生員禁言事律論杖除名四輔各具疏辨托言忠賢碑文使其遊士食客自為之至於取旨褒贊則文書官稱上命票擬臣等不能盡職計惟有見幾之作而徘徊其間冀有毫髮之益於國亦少盡區區之心耳并引陳平周勃狄仁傑事上優答之未幾四輔相繼去位惟國樞陛辭疏言煥猷書生義憤勃然自今觀之其言有一不行否用其言而棄其人何以發忠義之

原評云可於面百十層  
鐵甲

氣願還之胄監以作敢言從之人謂高陽此舉猶見相度勝同事諸人多矣四輔既被劾義難久留因合疏請赦卜上允之令部院會推以十人名具題是時逆璫餘燄未滅邪議尚存上明聖知列名前後不無意議為貯名金瓶中對天焚告行一拜三叩頭禮以筋夾之首得錢龍錫次李標次來宗道次楊景宸輔臣以天下多事求廣一二上乃復夾得二則周道登劉鴻訓也未幾來以署部時為崔呈秀之母請卹有在天之靈語為言路所糾楊在掌院時有頌疏上益疑會推之不足信始從衆望特諭召起舊輔韓蒲州矣

御史楊維垣既疏參崔呈秀擬與羣奸共收餘燼力持殘局時

已差河東巡鹽矣。掌道安伸疏請留佐大計。凡削籍諸臣雖屢奉起用之旨。維垣一手握定。百方阻遏。其游移兩歧。及本邪黨而偶被逐者。始為推轂。於是編修倪元璐。上方隅未化。正氣未伸。疏略言曰。凡攻崔魏者。必列東鄰為對案。名曰邪黨。以東林諸臣為邪人。黨人將以何名加之。崔魏之輩。崔魏而既邪黨矣。向之劾忠賢論呈秀者。又邪黨乎哉。且天下議論。甯涉假借。必不可不歸於名義。士人甯任矯激。必不可不準諸廉隅。自以假借矯激。深咎前人。而彪虎之徒。公然毀烈廉隅。背叛名教。於是乎連名頌德生祠。匝地矣。夫頌德不已。必將勸進生祠不已。必且呼嵩。猶寬之曰。無可奈何。不得不然耳。充一無可奈何。不得

不然之心。又將何所不至哉。今大獄之後。湯火僅存。猶以道學封疆四字。持為鐵案。深防報復。竊以為過計也。末因為舊輔韓爌詞。臣文震孟辯雪。浮謗請賜召用。又言鄒元標宜易名。海內書院宜修復。維垣隨出詞。臣持論甚謬。生心害政。可虞。疏糾之。倪復出微。臣平心入告。臺臣我見未除。疏畧云。維垣折臣。盛稱東林。以東林之護。李三才能。廷弼也。亦知東林中有首參魏忠賢二十四大罪之楊漣。及提問崔呈秀。欲追贓擬戍之高攀龍乎。且當時之議。於三才也。特推其揮霍之畧。未嘗不指之為貪。於廷弼也。特未即西市之誅。未嘗不坐之以辟。則猶未為失論矣。刑也。今以忠賢之窮。亮極惡。維垣猶尊稱之曰。厥臣公。厥臣不

愛錢。厥臣為國為民。何況三才。以虎彪之交。結近侍。律當處斬。初擬止於削奪。豈不驕兒。護之維垣。不聞駁正。又何尤。昔人之護熊廷弼。至行賄之說。自是逆璫。借以為楊左諸臣。追贓地耳。初擬以移宮一案。殺諸臣。及獄上。而以為難于坐贓。再傳覆訊。改為封疆。派贓毒。比此天下共知者。奈何尚守是說乎。王紀以參沈澹忤逆璫。而遣斥。文震孟以薦王紀而降削。均得罪於璫者耳。試觀數年來。破帽褰驢之輩。較超階歷級者。孰為榮辱。自此義不明。於是畏破帽褰驢者。相率為頌德建祠。希蟒玉馳驛者。遂呼父呼九十歲。而不顧矣。逆璫毀書院。逐正人。捐學士大夫之口。自鄒元標以偽學見驅。逆璫遂以真儒自命。學宮之席。儼

然揖宣聖為平交。使講學諸臣在。豈遂至此。維垣以無可奈何之心。為頌德建祠解嘲。假令呈秀舞蹈稱臣於逆璫。諸臣便以為無可奈何。而盡舞蹈稱臣乎。又令逆璫以兵劫諸臣。使從叛逆。諸臣亦以為可奈何。俛首從叛乎。初疏入。平湖施鳳來擬票。票有持論未當之旨。蓋猶堅持璫局也。至再疏入。上親覽。心動。得奉諭旨。維垣輩毒網。始無所施。人謂二疏實為廓清首功云。御史高弘圖疏言。魏忠賢亂政竊權。謀為不軌。廷臣但指為奸。皇上暴其罪狀。名曰逆。從此凌遲戮屍。頒布爰書。而案始定。彪虎怙寵。毒害忠良。法司初擬未減。皇上列其顯慝。勅用重典。從此論斬。遣戍。明著讞詞。而案始定。若夫傾危社稷。搖動宮闈。顯

稱擁衛之干戈爭作反叛之羽翼如劉詔劉志選梁夢環者罪實浮於虎彪詔以天子憲臣于忠賢像呼九千歲行五拜三叩頭禮非倡逆九邊使效尤乎又於先帝彌留日遵化教場點兵更置將領精甲良馬皆忠賢頒賜家丁直接都門非大聖人出而內應外合非詔而誰先帝在宮無驪褒之寵凡魚貫而進者非忠賢所貢概行殘害憚后又張國紀志選夢環連章糾劾一旦易后謀成兩賊為華歆矣志選僅與潘汝楨同削夢環弗與倪文煥同逮則閣臣票擬模稜非所以為訓也奉旨志選夢環著撫案提問劉詔先行革職

御史葉成章疏言李實督造蘇松參楊姜坐贓巡撫周起元力救之起元參道臣朱童蒙實遂譖于忠賢削逐起元橫坐以關說公事串入周順昌高攀龍周宗建李應昇繆昌期黃尊素而一網之緹騎四出械繫相續緊送鎮撫司而許顯純操其生殺之權矣李實構於外李永貞織於內顯純下此辣手即舉三凶立磔於西市未足償七臣之命也

上既命磔魏忠賢客氏斬崔呈秀即命定附逆諸臣罪給事中李覺斯疏參忠賢有十孩兒五虎五彪奉旨法司會議具奏虎為吳淳夫李夔龍田吉倪文煥其一則霍維華也維華廣布神通遂以已死之崔呈秀代之彪為田爾畊許顯純崔應元楊寰孫雲鶴時刑部尚書蘇茂相左都御史曹思誠大理寺署事少

卿姚士慎皆與璫黨者香火情深曲加護持引職司受財枉法律發衛附近衛所充軍終身倪文煥追贓五千兩吳淳夫三千兩李夔龍田吉各一千兩解助邊餉田爾畊許顯純引職官故勘平人因而致死律斬監後處決崔應元楊寰孫雲鶴引同僚官知情共勘減等發邊衛充軍讞上輿論不平甚惟時劉志選梁夢環以誣論張國紀傾搖國母薛貞以枉殺劉鐸皆相繼論列逮問而內外蒙狗起解無期給事中曹思稷疏言虎彪為逆瑞腹心同惡相濟按以交結之律甯有首從之殊乃牽引尋常貪酷職官律例巧為諸奸出脫其監候必於原籍充軍必於附近物議沸騰豈曰無因今劉志選梁夢環李永貞並奉旨提

問竊恐法司復祖前人故智以護虎彪者護諸奸也御史吳煥疏言昔年被禍諸臣朝問命而夕就道至不敢入與妻孥訣今虎彪諸奸雖屢奉明旨而詔書掛壁優游任意如劉志選梁夢環曹欽程輩或燕處家園或潛藏京邸輿援有靈朝廷無法薛貞以堂堂司寇為逆璫劊子抗不赴逮公然疏辯蔑法甚矣于是再奉嚴旨勒限嚴催起解云時新咨科道考選命下彈擊魏黨無虛日璫所拔用之大僚黃立極周應秋郭允厚孫杰陳九疇阮大鍼呂純如等咸次第撤回虎彪與諸奸始得逮問正法次年遂定逆案頒行天下吏部疏題贈卹死事諸臣高攀龍兵部尚書後加贈太子太保楊漣右都御史加贈太子太保左光斗右副都御

史加贈太子少保周起元兵部侍郎周順昌魏大中俱太常寺卿李應昇周宗建黃尊素袁化中吳裕中夏之令俱太僕寺卿周朝瑞大理寺卿繆昌期正詹事萬燦光祿寺卿各廕一子入監讀書炤品級賜祭葬丁乾學侍讀學士顧大章劉鐸太僕寺少卿張汶刑部員外郎俱賜祭葬奉旨高攀龍等守正捐生忠魂久鬱既經分別贈廕准如議行以昭朕顯忠勵世之意以熹廟梓宮發引廷試進士改於四月初二日上留心策士是日籲天祈得真才又將進呈三十六卷並貯金甌中以金筋夾之首得劉若宰遂定為狀元

按弘治乙丑科廷試進士孝宗皇帝亦焚香籲天於後宮是

科所得名臣惟顧鼎臣崔銑黃鞏魏校四人以文章品望著方獻夫以議大禮顯嚴嵩以貪奸敗今戊辰科所得如汪偉金鉉王章吳甘來周鳳翔徐汧李夢辰胡守恆史可法金聲劉之綸徐澤皆以死節著似勝於弘治矣而是科亦有宋企郊以首先降闖賊聞其他失節敗類者亦尚有人也是科以登極恩中進士三百五十人房考二十人科臣有帶副都銜者在逆璫亂政時所加然序列仍在翰林編簡後

三朝要典一書乃逆黨顧秉謙崔呈秀馮銓等迎合魏璫意借題以入諸正人罪者也其所指罪魁紅丸則以孫慎行為首移宮則以楊漣為首挺擊所以王之寀為首當日名賢一網俱盡

至是倪元璐請毀之。疏云：挺擊紅丸移宮三案，關於清流要典一書，成於逆豎，其義不可不兼行，其書不可不速毀。蓋當事起議興，盈廷互訟，爭挺擊者力護東宮，爭瘋顛者計安神祖，主紅丸者伏羲之言，爭紅丸者原心之論，主移宮者弭變於幾先，爭移宮者持平於事後，各有其是，不可偏非。既而楊漣二十四罪之疏發，魏廣微此輩門戶之說興，於是逆璫殺人則借三案，羣小求富貴則借三案，經此二借，而三案之面目全非矣。故凡推慈歸孝於先皇，即其頌德稱功於義父，網已密而猶疑有遺鱗，勢極重而或憂其翻局，於是諸奸始創立私編，標題要典，以之批根今日，則衆正之黨碑，以之免死他年，即上公之鉄券，由

此而觀，三案者天下之公論，要典者魏氏之私書，夫以閹寺之權，屈役史臣之筆，亘古未聞，當毀一未易代，而有編年不直書，而加論斷，若云彷彿明倫大典，則是魏忠賢欲與肅皇帝爭聖，崔呈秀可與張孚敬比賢，悖逆非倫，當毀二。矯誣先帝，偽撰宸篇，假竊誣妄，當毀三。又况史局將開，館抄具備，七載非難稽之世寔錄，有本等之書，何事留此駢枝，供人唾罵，當毀四。奏入上，即欲將要典焚燬，內閣來宗道擬旨，這所奏關係重大，着禮部部會同史館諸臣詳議具奏，御筆於具奏下，增聽朕獨斷行五字，既而衆議僉同，奉旨即行焚燬矣。侍講孫之獬詣東閣力爭，不可毀，繼以痛哭，復上疏極言不可毀之故，于是張承詔吳煥

吳玉等連疏參之。獬語皆絕快。而蕭山輩居中極力調護。僅票旨回籍。至次年定入逆案中。

朱文肅曰：甚哉小人之愚。自供罪案。又代為他人發揚盛美也。要典一書。先列爭者之疏。附以史斷。曲詆妄言。無所不至。然後附以駁者之疏。其人則楊維垣、趙興邦、徐大化、劉志選、崔呈秀也。由今而觀。五人之肉足食乎。骨之臭可洗乎。前之爭者或死或廢。其疏稿未必盡存。其子孫未必一一搜集。而要典收之。略盡。借天子威靈。既藏內府。又徧散民間。未幾內府燬而散者不可收。人皆得而見之。于爭者無不嘆賞。于駁者無不吐罵。而史臣數語。段段可羞。可恨。穢莫加焉。罪孰甚。

馬殆天奪其魄。自投穢廁中。沒頂而不可拔也。五人既坐大詬。其二又嬰大戮。此外又如劉廷元、岳駿聲、霍維華。才皆有為。皆入其中。吾惜逆賊既害多少善人。又累多少才人。故立身者不可不慎。總之功名之念淡。則思過半矣。

按文肅此論暢矣。然似微為劉霍致惜者。亦知倡瘋顛二字。以護挺擊者。廷元也。首開通內之徑。陰導逆璫。戕善類者。維華也。即謂之才。亦小人之才耳。何足言。

御史毛羽健疏參阮大鍼。先後舉主。前則五虎之倪文煥。後則十孫之長李魯生。非黨邪確証乎。甲子歲營吏垣之長恨趙南星。不與而與魏大中。遂拜忠賢為義父。而南星戍死。大中慘殺。

非害正確証乎。若通筭一疏，力詆左光斗，極罵周嘉謨等。臣言過戇一疏，復力薦之，非陽附正人，以掩其黨邪害良之確証乎。至屈指待皇祖鼎湖一語，此何事而今日屈一指，明日屈一指，以待皇祖之龍升，非大逆不道乎。初大鉞以附璫陞光祿卿，見璫敗，因上合筭七年通內諸臣一疏，以惠世揚串汪文言通王王安，并及諸人，冀掩其諂附之醜。至是被劾，即奉阮大鉞前後反覆陰陽閃爍，着閑住之旨。蓋長山所票也。大鉞因恨長山，遂私通內庭，暗布蜚語以構之，不久即得罪去。

御史任贊化、吳玉、鄒毓祚、鄧英、毛羽健等連疏參楊維垣把持朝政，黨邪害正諸罪，已奉旨下部議處。斥革矣。至是而原任尚

寶卿黃正賓，上除惡務本疏，畧云：結交內侍，明律森嚴，乃虎彪肆行，而子孫蟪集，究其為作俑者，魏廣微發縱指示者，徐大化也。大化始以攻熊廷弼為媚璫，贄見既而逢迎廣微，以擔當其謀富貴，某宜戍，某宜削。一一疏記與廣微使大肆其排擠之毒手，夤緣督理大工日，奉魏忠賢色笑，尅減工銀無筭。最後私受銅商厚賄，那借惜薪司錢糧二十萬兩，拂忠賢之意，罷令閑住。及睹逆局將敗，令表姪楊維垣疏參崔呈秀為翻身轉局地目。今大化維垣雖奉譴斥，潛居輦轂，日與閹臣往來，世界翻雲覆雨，已三轉於大化之線索，何叵測也。時蕭山票旨，有不必苛求句，御批楊維垣不許潛住京師，徐大化着回原籍去。

先忠毅與周宗建輩七公之逮也。由於織監李實之疏。李實已逮。問大辟矣。一日上召對時。宣刑部署部事侍郎丁啟睿問曰。李實一案有疑惑無疑惑有暗昧無暗昧。啟睿對九卿科道會問。據實回奏。上曰。李實何以當決不待時。啟睿對實與李永貞構殺七命不刑自招。上曰。豈有不刑自招之理。因問吏部尚書王永光。永光對。李實初亦不肯承。及用刑然後承認。上曰。重刑之下。何求不得。李實為魏忠賢追取印信空本。令李永貞填寫。如何含糊定罪。啟睿對。威福出于朝廷。一憑聖裁。上曰。持法要平。朕豈為李實。五虎五彪緣何不問他。決不待時。後一日召對。上特攜李實原疏示閣臣。曰。此李實參七臣原疏也。卿等可詳

細看。是硃在墨上。墨在硃上。諸臣羣覽久之。俱對以果是墨在硃上。上曰。可見是空頭本。復命傳諭九卿科道遞閱畢。於是宣閣臣改票。李永貞決不待時。劉若愚次一等。李寔又次一等。

按李實空印本是矣。安知非實預為日後卸罪地。故作此先硃後墨之伎倆耶。時為實齎奏者。司房孫升。何不即提之詰問。窮究到底耶。又不取實平日入奏之本。較對筆跡異同。耶。縱云填寫出於永貞。次一等足矣。何至又次一等也。王永光俯順上意。小人故態不必言。丁啟睿身列司寇。不能執法廷爭。乃以威福出於朝廷一語卸責。閣部科道又俱無一言糾正。此廷臣所以見輕也。明主可以理格。時遜之尚在童年。

同難諸子亦無一人在京執奏者使寃對未償大法未正痛哉至彪虎何以不問決不待時天語琅琅諸臣置面顏于何地當時讞此案為司寇蘇茂相竊謂其罪不減彪虎也厥後三法司會審彪虎諸奸始正大辟者主稿屬掌道蔣公允儀筆始無失刑矣

李永貞在忠賢名下用事三年十月陞玉帶隨堂秉筆賜坐蟒襪杌匝月五遷皆由逆賢心腹掌班劉榮所薦凡賊害諸人造謀寔由外廷線索永貞即非助逆殺人之人然其心地可槩見也七年八月上即位即告病未允至九月初七日始准辭十月初二即自砌于私宅小院穴墻以通飲食二十六

日聞逆賢允辭始出墻見人蓋初求退原欲與徐應元合成一局擯退逆賢從新另做世界至應元亦退永貞始手忙腳亂密托心腹掌班丁紹呂等饋王體乾王永祚王文政每人銀五萬兩三人畏永貞反覆憚上英明都不敢收十一月十七日各進獻御前是日晚永貞不自安密具鞍馬逃走二十六日奉旨降淨軍發承天顯陵安置舉家驚惶無覓至十二月初九日永貞外宅得報信人持永貞親筆帖取盤費即拿獲奏聞着押赴顯陵二月又調發鳳陽三月以御史劉重慶疏參提解赴京六月二十日會審引奸邪進讒言左使殺人律斬決不待時二十七日召對云李實空本永貞填寫驗是

黑壓硃上遂於十六日縛赴正義街斬訖

御史吳煥疏參漕運太監崔文昇引進李可灼漫投寒藥以致光廟賓天寔坐不赦之條而甘為逆賢心腹總督漕運控扼江淮要害與劉志選虎踞南北遙為聲援貪污慘刻人人切齒文昇在淮尤為縱肆剝軍虐民應行逮問疏入文昇拉同伴伏宮門哭聲達帝座上立拏首倡二監同文昇各杖一百俱降淨軍發往孝陵煥疏遂留中

應天巡撫李待問疏為地方死難諸臣高攀龍左光斗繆昌期周順昌李應昇周宗建顧大章請建祠尸祝言諸臣生平各有本末礪樹成著朝端揆厥致禍非擊魏逆之奸萌即褫崔賊之

貪魄不然觸克抗忌構端以陷之者也彼時虐焰四張群兇羅織殞身破家之慘無不為之號霜泣旱冤憤寔有同情此時天日重開褒爵賜廕之恩無不幸其潤枯噓槁昭揭尤有同志此各府士民相繼以尸祝請也乞下該部具覆特允本地建祠崇祀庶忠魂大慰泉臺直節永光來襁奉旨郡邑鄉賢祠原以俎豆示風勸近來濫入太多褻越巨典殊非舊制這慘死諸臣風節較著着有司遵旨速祀使士子曉然知忠孝之義不必建祠擬此旨者次輔吳江周道登也實欲阻鄉人之建祠故以送祀鄉賢為祠試觀當時縉紳即庸碌致位考終牖下者何一不入賢祠且入賢祠止須地方官批行何必奉旨哉聞之前

原評吳江不與也  
也

輩云、吳江本與璫黨臭味頗忤嫉諸正人憎及死骨故不喜同鄉有此盛事也。後經臺臣王道直、劉士禎論列，亦指及此。可見公論有在矣。故瞿公稼軒是時東先祖父有云：「朝政有見清明，邪黨尚守璫局，如聖慮皇皇求舊，彼必力肆擠排，皇衷懇懇恤冤，彼必痛加沉抑。有君無臣，且使人扼腕太息耳。」噫，向非聖主獨斷，即一切卹典亦安能如此之優渥哉。

御史黃宗昌疏言：「逆璫竊柄，陰謀叵測，皆由懷祿固寵輩當先而逢，有以生其矯竊問鼎之漸。如甯錦報捷，不過解圍自去，乃命爵論賞，即一毫無與者，皆陞官廕子，濫至百餘人。國家名器盡為逆奄收買心腹之物，此距先帝升遐時尚有旬日，或矯或否。」

半屬疑端，至三殿不日之成一敘，尤亘古所無。先帝賓天在八月二十二日，叙功行賞在二十二日，先帝久已不豫，此正大漸之時，豈有安閑出詔之理？不聞此時召我皇上付託大寶，反命大臣申諭國事，乃以不要緊之事為大顧命乎？蓋逆賢此時雄心正熱，故預先竊命，巧結腹心，此皆魏氏官非皇上官也。今日猶帶偽官立堂堂之朝，亦良心盡喪矣。奉旨宗昌知矯偽有人，不妨指名奏來。宗昌因復疏言：「臣只糾其事，不能盡憶其人。姑查郎報列名直指之，因舉黃克纘、霍維華、邵輔忠、呂純如等六十一人以對大約先帝上仙之日，即諸臣謝恩之日，揚揚得意，以假為真，總之皆所稱偽官也。于是奉旨下部查核，凡殿功邊功。」

所加恩典一槩削除不叙而爵賞始一清矣

戶科韓一良疏言皇帝平臺召對有文臣不愛錢之語然今世何處非用錢之地何官非愛錢之人向以錢進安得不以錢償臣起縣令居言路以官言之則縣令為行賄之首給事乃納賄之魁今咎守令之不廉然守令亦安得廉俸薪幾何上司督取既多過客動有書儀至考選朝覲動費四五千金此金非從天降非從地出而欲令守令之不愛錢乎至於科道人號為抹布言只要他人淨不管自己污也臣兩日來辭卻書帕五百餘金臣寡交猶然餘可知矣此猶為有名之饋臣則懼其以皇上之言路為嚇人之腐鼠若操一二愛錢之心則流水至矣乞大為

懲創使諸臣視錢為汗懼錢為禍庶不愛錢之風可覩至開之有原導之有節猶未敢深言也疏入上嘉之因召對出此疏命一良高聲朗誦畢付閣臣互閱劉鴻訓奏這弊有兩端有交際有納賄上問曰何謂交際鴻訓奏交際如親友饋遺情有可原納賄則希榮求寵便不可以數計上曰一良所奏大破情面忠鯁可嘉諭吏部破格擢用吏部尚書王永光奏曰科臣露章必有所指乞令指出一二重處以為貪官戒上召一良指疏中開之有原導之有流等語可據實具奏一良對臣今未敢深言待  
平後具奏上又令指名一良曰此二語蓋指事例言若納賄等事臣疏中原說風聞上怒曰難道一人不知遽有此疏限

五日內指名來一良回奏參周應秋闔鳴泰張翼明褚太初上  
又召一良面詰曰周應秋等自有公論張翼明已下部議何待  
爾參復取前疏反覆展視御音朗誦至此金非從天降及辭卻  
五百餘金一段擊節嘆賞聲厲臣隣問一良此五百金何人所  
饋一良對臣有交際簿在上固問終以風聞對上遂震怒即諭  
閣臣曰韓一良所奏前後矛盾前疏明明有人今乃以周應秋  
等塞責劉鴻訓等合詞奏請再三上愠曰都御史不是輕易授  
的要實功鴻訓再奏曰臣不為皇上惜此官但為皇上惜此  
一言上曰分明替他說話豈有紙上說一說便與他一個都御  
史復召一良面叱曰所奏前後矛盾顯是肺腸大換本當拏問

姑饒這遭

甯錦督師缺廷推袁崇煥赴任陞辭上召問曰封疆淪陷遼民  
塗炭卿萬里赴召忠勇可嘉所有方略可具實奏聞崇煥奏所  
有方略已具疏中臣受皇上特恩願假以便宜計五年而東可  
平遼可復上曰五年□便是方略朕不吝封侯之賞卿其努  
力以解天下倒懸之苦卿子亦受其福崇煥謝恩暫退時上亦  
暫憇便殿給事中許譽卿面叩五年之略崇煥言聊慰上意耳  
譽卿言上英明豈可浪對異日按期責功奈何崇煥自覺失言  
頃之上再御便殿崇煥即奏□四十年蓄聚此局原不易結  
但皇上留心封疆宵旰於上何臣忍言難此五年中須事事應

手首先錢糧上即召戶部署事王家楨令竭力措辦毋致不充於用又諭崇煥又請器械凡解邊弓甲等項必須精利上即諭工部署事張維樞所解各項須鑄定監造司官及匠作姓名有不堪者核查究治崇煥又奏五年之中事變不一必須吏兵二部俱應臣手所當用之人即為選授不當用者勿為濫推上即召吏部尚書王永光兵部尚書王在晉諭以崇煥意崇煥又奏以臣之力制□而有餘調衆口而不足一出國門便成萬里忌功嫉能夫豈無人即凜凜於皇上法度不以權掣臣之肘亦能以意亂臣之方略上起立竚聽久之尋諭曰卿條奏井井不必謙退朕自有主持閣臣劉鴻訓等俱奏請假崇煥便宜賜之

原評此等時切痛處  
敗皆由於此

尚方至如王之臣滿桂之尚方應行撤回以一事權上然之遂命傳示該部遵行

王象乾以原官起用總督宣大陞見上召同閣臣俱入楹內去御案咫尺蓋異數也上曰卿三朝元老忠猷素著見卿矍鑠知袁崇煥薦舉不差有何方略可面奏來象乾奏臣年踰八旬齒疎不能詳奏所有方略具在疏中上固問之象乾先言□

諸酋離合始末因奏朵顏等三十六家今日□當與哈慎等一同連絡可得數萬安插薊鎮沿邊駐牧為我藩籬似亦可以敵□上曰觀揅意似不肯受撫者象乾奏從容籠絡撫亦可成上曰禦□當恩威兼濟不可專恃羈縻閣臣劉鴻訓奏聞□酋

哈慎印今之哈喇沁

知王象乾至退去六百餘里上即問退去在何地方鴻訓不能對象乾代奏退去直北沙磧中上又問倘款事不成如何象乾密奏□情數百言上始色喜諭曰卿年雖逾八旬精力尚壯卿撫□於西袁崇煥禦於東恢復功成皆卿等之力也百官皆俱叩首退

按崇煥原知邊事難為冀以款羈縻歲月故舉象乾專主撫也象乾既赴任專任挿首撫賞事宜舊例屬□出馬中國出出綵繒互相貿易名曰馬市□中駒初生繫其母於山頂駒從下一躍而上者留充馳驅躍至半而踣者殺以為食懦不能躍者則以與中國市象乾建議彼既以駕馬相欺不若卻

其馬以價之半與之少司馬申用懋謂所市馬誠不堪用然每歲徵馬以萬計於彼不無少損且以幣易馬尚為有名若無故斂幣與之去歲幣幾何又挿索數甚奢若遽損其數彼未必聽命塞外舊棄地甚多盍以秦甯等地為請能歸我舊疆我當如所索不能然後減損其數則我為有辭矣時象乾年耄無遠圖當事俱急欲成功苟且從事不半年而內犯闡入大同殺戮甚慘撫卒不成浪擲金錢幾千萬云

袁崇勳煥甫至錦州即連疏請餉上御文華殿召諸臣諭曰前崇煥云安挿錦州兵變可弭今又云欲鼓譟求發內帑與前疏何相矛盾卿等奏來時諸臣有請免發者上詰問戶部尚書畢

自嚴自嚴極言戶部闕乏容當陸續措給上曰據崇煥疏云初三日即變今已初二日即發去已遲何救於鼓譟又曰內帑外庫俱係萬民脂膏原用以保封疆安社稷若發去寔寔有用朕豈吝此且委實不足有人盜去卿等那得知禮部侍郎周延儒奏國家最宜關門昔防口變今又防兵變前甯遠鼓譟未曾處置今又因鼓譟發帑倘各邊効尤將何底止上曰卿以為何如延儒奏臣非敢阻皇上發帑此時安危在呼吸間固當與之然非常策須還畫一經久之計上曰此說良是若事急專一請發內帑豈不涸之源何以應之上又曰爾等不肯大破情面極力力擔當動稱邊餉缺乏每下旨通不見解來即如贓銀充餉至

今不到頭解行查至今不回奏如此稽遲錢糧何時得足又曰你們每每求舉行召對文華商確猶然事事如故將對都成舊舊套商確俱為空文何曾做得一件寔事又曰朕即位以來孜孜求治以為卿等當有嘉謨奇策召對商確未及周知者悉為朕告乃推委不知朕又何從知之時天威震迅憂形於色諸臣皆戰懼稽首而退時元年十月初二日也越數日復召對諭缺餉事須講求長策遼兵動輒鼓譟各邊効尤將何底止延儒奏軍士要挾畢竟別有隱情古人還有羅雀掘鼠軍心不變的今各兵只少他折色銀兩如何動輒鼓譟上曰正是如此古人還有羅雀掘鼠軍心不變動的今雖缺餉豈遂至此延儒又奏安

知非不肖將官造出恐赫言語搖惑軍心上稱善者再自此兩番召對而延儒遂簡在帝心矣

挿入犯大同總兵渠家禎閉門不出任其殺掠上召百官諭云朝廷養士費許多兵餉一旦有警便束手無策只曉得請兵請餉又曰□戮人民巡撫不能防禦是功是罪止仗一懶嘛僧講款不令輕中國耶又曰邊疆失事只參總兵等官難道叙功不陞文官朦朧偏護朕甚惡之後家禎疏至上示閣臣俱言大同失事家禎擁兵坐視豈能逃罪上曰督撫如何令千餘兵馬便要丟敵□十餘萬衆渠家禎既有罪督撫作何事劉鴻訓奏武臣在外調兵文臣在內調度上曰文臣還當節制武臣今督

撫一向不行操練平日虛冒臨敵張皇以千餘弱軍抵十萬強敵如何抵得鴻訓奏皇上責備文臣極是但自皇祖靜攝以來至先帝時已二十年邊備廢弛已久一時猝難整頓上曰而今何如輔臣等俱奏而今比前大不相同上曰此皆是贊揚之辭尚未見行一實事如何便見大不相同諸臣默無以對又一日御講筵問閣臣曰宰相須用讀書人當作何解周道登對曰容臣等到閣中查明回奏上始有愠色既而微哂之又問近來諸臣本內多有情面二字何謂情面道登對曰情面者面情之謂也左右皆為匿筴噫有君無臣之慨已於此數事見之矣工科黃承昊奏言東南時患水災因水利不修上問水利為何

不修閣臣錢龍錫周道登同奏水利是東南第一大事但修理要錢糧前已擬旨着撫按酌議上沉思久之曰要修水利可擾民否龍錫奏臣等惟恐擾民故行撫按酌議御史毛羽健疏請蘇驛遞上即令羽健自讀因諭閣臣曰驛遞疲困已極小民敲膏吸髓馬不息蹄人不息肩朕甚恨之若不痛革民困何由得蘇卿等即擬票來及票至上以內有撫按司道公務外俱不許遣白牌語屬含糊命改票御史梁子璠請汰兵清餉內有邊臣虛冒等語上召戶兵二部問何冒濫至此戶部署事王家禎兵部尚書王在晉奏兵餉濫冒已久各邊有事督撫屢次請添兵餉情弊已非一日又讀至老弱之人曾荷戈而勿克上矍然曰

曰荷戈皆老弱如何不查隨敕戶兵二部差廉幹司官挨年挨月查核具奏又一日召對特召科道官至前諭曰朕思進賢退不肖故令爾等為耳目司舉劾就中不無濫冒爾等試一思之所舉者果人人皆賢所劾者果人人皆不肖乎朕特降諭切責有反坐二字以求直言今又面諭爾等各箱口不言要科道官何用蓋上孜孜求治朝夕靡甯竟無一人能仰慰聖意者至蘇驛遞清兵餉尤屬救時良策而奉行不善反以開流寇之禍悲夫召御史吳玉讀所劾樞臣王在晉疏至在晉何如人也命高聲讀至公子親家等語上問親家姓名又問疏中壘斷字面玉曰壘斷是市人登高處左右望而取利之意又讀至時局等語

上問何為時局玉曰即當時是魏忠賢的局面今日是皇上的局面上怒曰如何以他比朕又讀至妄自矜詡等語上問輔臣何如李標奏在晉屢被人言宜放他去上曰事事有箇是非如何只教去便了又問張慶臻一事如何改救閣臣奏先見兵部手本慶臻揭帖在後上問慶臻如何敢送私揭慶臻奏以小事不敢瀆奏上曰改救如何是小事又令諸臣及科道官奏王道直等俱云慶臻用賄改救是實吳玉又奏劉鴻訓主使慶臻奏改救是中書臣只多了一揭上怒其妄辯叱之因以擅改救書罪下九卿科道會議議上奉旨劉鴻訓擅增勅書欺君說謊發邊衛克軍王在晉徇私受囑并司官苗思順俱革職張慶臻行

賄鑽營念係動臣罰俸三年中書田佳璧等法司定罪其吳玉王道直等參劾有據各加一級先是慶臻奉命提督京營教內增有兼管捕營四字提督鄭其心以侵職掌論之上命查寫敕中書官因追究賄改緣由云

命會推閣臣以成基命錢謙益鄭以偉孫慎行李騰芳何如寵薛三省盛以弘羅喻義九人名上溫體仁憤其不得與也因疏訐錢謙益於辛酉科主試浙江賄中錢千秋不宜與推上召廷臣面問體仁謙益辨良久上問體仁所稱神奸結黨者誰體仁奏謙益之黨甚多臣不敢盡言至此番枚卜俱是謙益主持吏科章允儒奏錢千秋一事已經問結體賢仁雖深望甚輕因會

不出之下蓋注注云  
脫誤

張鳳翔入 國史貳臣傳

推不與遂爾熱中如糾謙益何不糾於未推之先體仁奏科臣此言正見其黨蓋前猶冷局參他何用糾於此時正為皇上慎用人耳允儒奏從來小人陷君子皆以黨之一字當日魏廣微欲逐趙南星等於會推疏中使魏忠賢加一黨字盡行削奪至今為小人害君子之榜樣上怒叱曰胡說御前奏事怎這樣胡扯掣了錦衣衛將允儒扶出體仁又奏皇上試問冢臣王永光屢奉溫旨何以不出瞿式耜有言直待完了枚卜然後聽其去皇上方眷注冢臣如何命他去又奏謙益熱中枚卜先是使梁子璠上疏令侍郎張鳳翔代行會推此從來未有之事上召諸臣問曰枚卜大典會推要公如何推這樣人是公不是公諸臣

奏來閣臣李標等俱奏關節與謙益無干前已招問明白上曰招也極閃爍不可憑據禮部侍郎周延儒奏皇上再三下問諸臣不敢奏者一則懼干天威一則牽於情面總之錢千秋一案關節是真不必又問上又詰問曰九卿科道會推便推這樣人就是會議今後要公不公不如不會議卿等如何不奏延儒又奏大凡會議會推明旨下九卿科道以為極公不知外廷只是一二人把持定了諸臣多不敢開口就開口也不行徒然言出而禍隨上命再奏延儒復奏如前上曰朕問卿等別無言答應何貴召對因目視延儒曰適二班官中只這官奏了數句又謂輔臣曰諸臣如此反不如稱功頌德之時邊方也完固財用也

充裕今枚卜且暫停時謙益伏地待罪命出外候旨次日奉旨  
錢謙益關節有據又濫與枚卜有黨可知着革職回籍錢千秋  
法司提問又旨章允儒徇私滅公肆言無忌革職為民耿志煒  
梁子璠罰俸一年瞿式耜房可壯降級調外

先是兩次召對上以宜興奏語稱旨已心屬之適當枚卜同  
鄉恐兩人不能並相因力阻宜興宜興不堪也許公霞城欲  
為兩解之商之掌垣章公章亦唯唯再過虞山寓則瞿公  
稼軒在坐執意堅拒且以擁戴宜興譏許公矣虞山且云彼  
與涿州相知非吾臭味若推宜興可不推我許公遂不置喙  
喙宜興見絕之已甚因與烏程合謀烏程既出疏忽蒙召對

原評用宜興之效後既  
大著矣及者宜興亦  
亦清不堪似宜興較  
耳

虞山猶不知以為拜相定于此日洋洋得意及入對方知有  
疏兩人廷辨烏程言如涌泉虞山出于不意言頗屈科道諸  
臣又多為虞山左袒者於是黨同之疑中於上意不可解矣  
宜興雖與涿州同年相好當涿州附庵拜相時宜興正居  
憂在籍未嘗附之陞官也丙寅之獄諸賢以忤璠被難者宜  
興皆力為揀援貽書涿州規以大義一時同志皆稱之不獨  
遜之一人之私也乃虞山輩獨絕之已甚激成一番水火反  
使烏程得志惜哉

御史毛九華糾溫體仁送祠獻媚詩冊任贊化參體仁居鄉不  
法諸事上復召對命宣九華疏以問體仁體仁奏若有獻媚璠

祠詩必手書為贄無木刻之理既刻流傳廣布豈有九華獨得之途中京師反無刻冊且何不發於籍沒逆璫之時而待於九華之手若以刻本為據則刻匠徧滿都門以錢謙益之力何所不可假捏上如言詰九華九華對臣八月買自途中上曰八月買的如何纔發九華對臣十月考選上問閣臣如何說首輔韓爌奏體仁平日硜硜自守亦有品望止以參論枚卜一疏忿激過當致犯眾怒上展冊指後四人俱杭州人定是此四人所為只問此四人便知又召翰林官宣讀任贊化疏問溫體仁體仁奏臣之居鄉惟知奉公守法贊化不參臣居官之事而參臣居鄉之事以為誣臣居官之事懼皇上召問廷臣欺罔立見故誣

以居鄉之事以為道里遙遠耳目易眩因參贊化為錢謙益死黨代謙益首攻陳以瑞以瑞係逆璫削奪皇上賜環因曾參謙益科場之事贊化反以媚璫糾之把持銓部覆之為民又贊化相才一疏稱謙益為伊周班行此皆為謙益死黨之証上曰不必多說自此體仁徧以孤忠見知於上而結黨之說深起聖疑攻者愈力而聖疑愈深矣

御史吳甦疏言舊制六年京察為諸臣不修職業者設若大奸大惡附逆害人者亦在此例如劉瑾之敗一時附瑾用事者或誅或戍或削或降皆不待京察以此輩罪大人多考功法所不載也忠賢之亮惡倍於瑾附忠賢之罪惡亦甚於附瑾之徒大

略有四如動搖國母逼封三王虎彪義子上公封爵名曰佐逆  
借題殺人屠戮忠良門戶封疆一網打盡名曰害正稱功頌德  
聚斂建祠薦引邪類要典詆誣名曰媚璫賄通權奸入幕密謀  
矯加職銜一歲九遷名曰速化此皆不知有朝廷吐罵由人廉  
恥盡喪務須徹底澄清斬斷根株若混入察典則名目不分額  
數有限掛一漏萬何以示懲奉俞旨下部未幾遂奉特諭有逆  
案之定實自此疏起之御史侯恂亦有疏言除奸察吏不可並  
行語俱暢快

大計京朝官南京吏部尚書鄭三俊右都御史陳于廷公疏於  
察典外舉南京媚璫之人二十人大理寺謝啟光科郭如閣御

史何早李時馨夏敬臣劉漁徐復陽戶部魏象胡芳桂張聚垣  
禮部虞大復顏鵬葉天陞兵部周宇李際明邸存性工部魏弘  
政葛大同歐陽克材應天府夏之鼎或甘心附逆或懼禍中變  
律以順逆之理無一可貸據實奏聞奉俞旨下部此亦在未奉  
諭定逆案之前也

上御平臺召閣臣韓爌錢龍錫李標吏部王永光左都曹于汴  
命定附逆諸臣罪閣臣先僅以四五十人列案以請上天不然  
再令廣搜又益以數十人上怒其不稱旨且曰此輩皆當依律  
法治罪諸臣以未習刑名對乃召刑部尚書喬允升同事又問  
張瑞圖來宗道何以不入對曰二臣無事實上曰瑞圖以善書

為逆璫書祠頌碑文宗道題崔呈秀母卹典稱在天之靈其罪更重又問賈繼春何亦不入閣臣對繼春言善待選侍不失厚道後雖反覆其持論亦可有取上曰惟反覆故為真小人於是復將御前祠頌紅本發下令據實定罪分列擁戴諂附建祠稱頌贊導諸款首冠以大逆魏忠賢客氏令刊布中外吏部都察院接出聖諭朕惟帝王憲天出治首辨忠邪臣子致身事君先明逆順經凜人臣無將之戒律嚴近侍交結之條邦有常刑法罔攸赦逆豎魏忠賢猥狡不才備員給使傾回巧智黨籍保阿初不過窺嘖笑以伺陰陽席寵靈而饜富貴使庶位莫假其羽翼何蠢爾得肆其毒痛乃一時外廷朋奸悞國實繫有徒或締

好宗盟或呈身入幕或陰謀指授肆羅織以屠善良或秘策合圖扼利權而管兵柄甚且廣興祠頌明効首功倡和已極於三封稱謂侵疑於無等誰成逆節致長燎原及朕大寶嗣登嚴綸屢霽元兇逆孽次第芟除尚有飾罪邀功倒身竄正以望氣占風之面目誇發奸指倭之封章跡其矯誣烏容錯貸朕鑒察既審特命內閣部院大臣將發下祠頌紅本參以先後論劾奏章臚列擁戴諂附建祠稱頌贊導諸款據律推情再三訂擬首正奸逆之案麗於五刑稍寬脇從之誅及茲三褫其情罪輕減者另疏處分姑開一面此外原心宥過縱有漏遺亦赦不究自今懲治之後爾大小臣工宜洗滌肺腑恪遵職業共遵王路悉斬

葛藤無曠官守而假事請張無急恩仇而借題糾舉朕執是非以衡論奏程功實以課官方有一於斯必罪不宥尚各懲毖乃亦有終欽哉故諭

一首逆 魏忠賢 客氏 依謀大逆律不分首從皆凌遲處死已經正法

一首逆同謀 崔呈秀 李永貞 李朝欽 魏良卿

侯國興 劉若愚 依謀大逆但共謀者不分首從皆凌

遲處死律減等擬斬

一交結近侍 劉志選 梁夢環 倪文煥 田吉

劉詔 孫如冽 許志吉 薛貞 曹欽程

吳淳夫 李夔龍 陸萬齡 李承祚 田爾畊

許顯純 崔應元 張體乾 孫雲鶴 楊震

以上依諸衙門官吏與內官互相交結泄漏事情實緣作弊扶同奏啟律斬秋後處決

一交結近侍次等 魏廣微 徐大化 霍維華

張訥 閻鳴泰 周應秋 李魯生 楊維垣

潘汝楨 郭欽 李三才 以上依結交近侍官員律

減等充軍仍行各撫按招擬有賍私情節一併看明奏請發落

一逆孽軍犯 魏志德 魏良棟 魏鵬翼 魏撫民

李魯生入國史貳臣傳卷十  
先據志能作李之才

原評楊文昌 傅之深  
馮繼先 崔鏗  
董芳名

業國史載臣傳求之其  
在城 李相  
馮銓 謝啓光  
李若琳 李魯生  
孫之獮

魏希孔 魏希堯 魏希舜 魏希孟 魏鵬程

傅應星 楊六奇 容光先 徐應元 劉應坤

王朝輔 冷文輔 孫暹 王國泰 石元雅

趙秉彝 高欽 王朝用 葛九思 司雲禮

陶文紀 李應江 胡明佐

一交結近侍又次等 馮銓 顧秉謙 張瑞圖

來宗道 郭允厚 薛鳳翔 李蕃 孫杰

張我續 朱童蒙 楊夢衮 李春茂 李春燦

王紹徽 徐兆魁 劉廷元 謝啟光 徐紹吉

邵輔忠 楊所修 賈繼春 范濟世 李養德

阮大鍼 姚宗文 陳九疇 卞詩教 趙興邦

傅樾 安伸 孫國禎 郭鞏 馮嘉會

曹思誠 孟紹虞 張樸 李恆茂 郭尚友

李精白 秦士文 卓邁 陳爾翼 石三畏

郭興治 張文熙 盧承欽 何廷樞 陳朝輔

許宗禮 劉徽 楊維和 何宗聖 王琪

汪若極 陳維新 智鋌 游鳳翔 田景新

呂純如 吳殿邦 門克新 李從心 楊邦憲

郭增光 單明詡 黃運泰 李嵩 牟志夔

張三傑 曹爾楨 王點 張文郁 周維持

徐復陽 黃憲卿 毛一鷺 張養素 汪裕

梁克順 劉弘光 許其孝 鮑奇謨 陳以瑞

莊謙 龔萃肅 溫臯謨 李應荐 何可及

李時馨 劉漢 王大年 余合中 徐吉

宋禎漢 張汝懋 許可徵 劉述祖 李燦然

劉之待 孫之獬 吳孔嘉 李寓庸 潘士聞

王應泰 張元芳 阮鼎鉉 李若琳 張永祚

周良才 曾國禎 張化愚 李桂芳 張一經

陳殷 夏敬承 周宇 魏象 郭希禹

頡鵬 李際明 魏弘政 岳駿聲 郭士望

原評引國權注增  
李應公

張聚垣 周鏘 徐四岳 辛思齋 胡芳桂  
以上依結交近侍官員律引名例律減三等坐徒三年納贖  
為民

一諂附擁戴 李寔 李希哲 胡良輔 崔文昇

李明道 劉敬 徐進 馮玉 楊朝

胡賓 孟進寶 劉鎮 王體乾 梁棟

張守成 高承德 以上一款十六人并前一款徐應元

等十六人俱為民當差

又疏列次等四十四人 黃立極 施鳳來 楊景宸

房壯麗 董可威 李思誠 王之臣 胡廷宴

張九德 馮三元 喬應甲 楊維新 朱國盛

馮時行 呂鵬雲 董懋中 周昌晉 虞廷陞

楊春茂 徐景濂 陳保泰 郭興言 周維京

徐揚光 陳序 曹谷 朱慎鑿 郭如閣

何早 虞大復 葉天陞 邱存性 葛大同

夏之鼎 張九賢 李宜培 譚謙益 歐陽充材

吳士儁 徐溶 潘舜曆 李三楚 先機作董 童舜臣

陳守瓚 以上炤考察不謹擬冠帶閑住御筆抹去冠帶

二字

此案主筆者首輔韓參定者次輔錢崇暨部院三人也首輔

持正有餘剛斷不足况冢宰身曾頌逆而與定附逆之案有不私庇同黨掣肘當事者乎所賴聖明嫉惡甚嚴申諭再四諸臣惕於明綸不敢不遵命以從事然彼上副聖天子錯枉之權下昭萬世臣民之戒者尚有未盡也自此以後下之謀翻者伺之十七年如一日上之堅持者亦十七年如一日直至南渡後馬阮用事案翻而國運隨之以盡尚得謂小人之進退不關興亡大數哉

命給慘死諸臣高攀龍楊漣左光斗周起元周朝瑞繆昌期魏大中周順昌李應昇周宗建袁化中黃尊素夏之令吳裕中萬燝等三代誥命從吏部驗封司郎中徐大相之請也

先是褒卹命下各家諸子赴闕謝恩上訴先臣受冤始末因各有所陳乞如楊之易周廷侍夏承請給還原贖即各奉命給五百金魏學濂疏其兄泚死孝請附墓祔祭高世儒繆虛白請母氏封誥遜之請祖父母封誥皆奉旨俞允至是周茂蘭疏援會典覆允矣封司徐公謂各臣事同一體不宜有異封典該部職掌不須子孫一一自陳遂合諸臣姓名彙題同請即奉俞旨斯直從前未有曠典敢備記之以誌聖恩并見當事善推上意表揚先忠之盛美時政府司票擬者為首輔韓蒲州次輔錢華亭二公云

鹿善繼叙同難錄畧云皇上神聖其用意深遠每非臣下所能窺如言及逆黨人孰不言之恨之未幾而漸平矣言及諸忠功臣孰不憐之痛之未幾而亦漸平矣漸平漸忘且托于見善不喜聞惡不怒之說而復厚誣吾君於逆案欲從寬于褒忠欲從薄也至欽定逆案凜然天誅而三代誥命之給即在此時然後知聖主善善惡惡不為衆淆不以久倦且不因煩生厭也肯持必不望報之論使為惡者畢竟得利為善者畢竟不利也耶

御史方大任疏奏會審曹欽程事欽程面出揭言馮銓為其房師召欽程使論周宗建四人以周在先張慎言次之張曾論其父也必附以李應昇黃尊素則南樂深仇也數日後復召至其

寓李魯生先在袖出疏稿逼欽程上矣。次年冬田仰以浙臬齎捧入京，與馮言吳越之會，有七人一黨，周順昌、周宗建、高攀龍、黃尊素、繆昌期、李應昇、交通周起元，私謀翻局。馮即欲謀致七人於死，復欲迫欽程再上疏，欽程力拒之。馮大怒，即授意本房門生潘士聞上疏荐仰，而論欽程，仰立轉京堂。欽程立遭削奪，是首造意者馮涿州，成其謀者李魯生，欽程其威逼脇從者也。後此之播虐，專主其事者亦涿州，成其謀者田仰也。其言鑿鑿如此。銓媚璫害人，章奏屢見，即臣亦銓使其門生王珙所參。臣去年已久告其詳矣。今總聽皇上之睿斷云。田仰隨有疏辯言欽程參四臣於乙丑之二月，臣不在京，七臣被逮於丙寅之

七月，臣入賀事竣，久赴粵矣。欽程且謂於彼無干，何以反謂臣造惡乎？時逆案已定，聖旨遂不深究，止欽程坐大辟。

欽程之疏出於馮銓，確矣。至丙寅李寔之疏，據實辯為李永貞誘空頭印本入京填寫，則亦有銓等與謀，何疑？惜當事僅以永貞、欽程抵罪，竟未窮究其事也。若田仰辯疏云七臣死于丙寅七月，時已事竣赴粵，然寔疏之上寔在二月，諸臣被逮皆在三月，被害在六月，正仰在京時。繆云七月遁詞情見矣。况仰與馮銓、魯生本至交，即非造謀之人，亦與謀之人也。竟得脫然事外，僅以京察拾遺奪職幸矣。至竄伏數年，弘光南渡，黃緣燃灰，督撫淮揚清兵一至，稽首投降，小人故態如

是又何言哉。

二年二月十四日皇長子生中宮周后出永樂以後惟自武宗毅皇帝為孝宗正宮張皇后所出其餘中宮並無生子者

后父周奎係蘇州府長洲縣人后生於葑門內今有坤儀鍾瑞坊尚存后幼隨父居京師以天啟七年選為信王妃旋正位中宮后父封嘉定伯有賜第在葑門

聖躬燕處之所為屋三間而不竝列由第一間而後第二間第三間其第三間聖躬燕息處也第二間中設大薰籠置衾裯之屬凡召幸宮眷至第一間則盡卸諸衣裳裸體至第二間取衾裯被身乃進第三間也所謂抱衾與裯也即中宮與東西兩宮

不敢不遵行此禮唯先后以藩邸同甘苦不肯赴召又駕至中宮后必趨出宮門外接駕先后亦以糟糠故廢此禮不用

應天巡撫曹文衡奏解進罪輔顧秉謙窖藏銀三萬八千餘兩請留充該府本年兵餉奉旨允行秉謙素行貪鄙天啟中以投身逆璫得大拜在閣四年唯以婪賄為事至秉軸票擬一奉逆璫之意旨然貪鄙之甚璫亦漸厭之於是准其請告歸家璫敗後臺省交章劾其庸惡無恥媚璫悞國奉有頑鈍依阿之旨居鄉猶肆虐鄉里黷貨無厭崑山合邑士民積怨不平羣起攻之登門辱詈秉謙於昏夜挈貨潛遁其居室遂搶奪一空州縣力為禁輯士民稍安旋奉旨搜其家中所遺已為家人藏匿及地

方搶散殆盡止得其害藏現銀尚有此數蓋僅存十之一耳  
詹事羅喻義等公疏為故輔張居正陳情乞恩奉旨居正佐我  
皇祖肩承勞心力振紀綱飭弛舉廢多有可紀雖以奪情及身  
身後蒙議然過不掩功委當垂卹張居正其子懋修量復職銜  
該部從公看議具奏准復二廕并給還應得誥命

工部節慎庫主給發商人上供顏料銀兩最稱弊數設有監督  
主事一員巡視科道二員皆為釐奸剔弊計而諸臣奸弊更甚  
二年四月尚書張鳳翔發其事有發銀一千兩寔給四五百者  
上特御文華殿召對面詰再三拿巡視科道王都高賚明主事  
劉鱗長俱下獄究問又追論元年同事諸臣祖重華吳阿衡二

人狼籍最著者俱下獄後以邊才出為監軍御史餘分別譴謫  
命收葬熊廷弼從其子兆璧請也先是御史饒京疏中言及閩  
中已擬批行而御筆抹去之至是因兆璧上疏閣臣即具揭為  
辯白略云廷弼初任巡按任總督其功狀皆有可言至遼陽既  
失再起經略與巡撫王化貞戰守異議廷臣又為之分左右袒  
致甯廣潰敗與化貞並馬入關挾忮昧淺畏悞疆圉大計以此  
殺身無辭公論今傳首邊廷頭足異處已足為戒矣然使當日  
按封疆失陷之律偕同事諸臣一體伏法自當目瞑乃先以無  
影賄賍坐揚漣等作清流之陷阱既又以刊書惑眾借題偏殺  
身死賍懸辱及妻孥長子自刎斯則廷弼死未心服也且自有

遼事以來騙官營私不知凡幾廷弼再任不取一錢不通一饋終日焦唇敝舌爭言大計似猶此善於彼魏忠賢竊柄人俱靡然從風廷弼一長繫待決之人終不改其強直自遂之性以致獨膺顯戮慷慨赴市耿耿使腸猶未盡泯今傳首已逾三載收塋原無禁例且茲事雖屬封疆於邪正本末無有關係數年來是非功罪悉在聖鑒或不以為謬也始奉旨允行至四年秋後行刑化貞亦即處決矣

四月十七日上講讀既竣出一疏示輔臣則山東益都縣有驛丞黃道妻為夫頌寃蓋鄉紳唐煥之弟行馬牌不厭意捶斃驛丞承之子以觸柱死父以叩閹死都中其妻官氏復上書訴寃

也上曰驛遞申飭屢矣何縱橫敢爾子弟如此本官可知鄉官如此地方官可知一府同知代為申詳不能竟道府匿不報皆當重懲輔臣承旨退上方欲清驛遞故留意如此而辭氣仍安和不迫也

上親講讀凡講書史遇詞旨無甚關係及凶暴不祥宜避者悉置勿講或越過一二章或數章舊例也一日講官丁進講中庸越鬼神章講舜其大孝二節上即展前一節環視欲問未果已而李孫宸講君子無所爭一節則自子張問十世以下至季氏旅於太山越七章講將半上復展前數葉然有聲講竣遂問前幾章何以不講孫宸婉轉對曰此數章無甚妙理上又問復

對曰。是閣中派定也。上指旅太山節。曰。想為季氏僭分。耶。旋宣講官丁進。進出班跪。上命之起。遂問鬼神之為德章。無甚忌憚。何以不講。進逡巡未對。上顧輔臣。輔臣皆趨近御案。首輔韓爌對曰。鬼神之事。頗涉窈冥。上曰。還要補講。起來進承旨叩頭而退。聖心留意典學如此。

六月初九日。召對廷臣於平臺。上曰。天時亢旱。雨澤愆期。朕日夜焦憂。所以召卿等面諭。從今日御文華殿齋宿。可傳示大小臣工。竭誠祈禱。無事虛文。或刑獄有失平。都要清理歸結。朕擬一諭。卿等參酌。輔臣起立案傍。上指示諭中款次。正色言曰。如此大旱。皆因政事失當。是朕不德所致。輔臣韓爌奏。皆臣等奉

職無狀。以致皇上焦勞。上曰。也不是只等說。還須上下交修。修舉寔事。卿等俸祿俱是小民脂膏。見此荒災。心豈能忍。又曰。各衙門事多沈閣。科道官通不言。他們於外事誰不知。只是碍於賂情面。如御史梁子璠條陳汰冗官。先上二疏。後又催二疏。只纔不知是虛文。仍以聖諭授輔臣曰。未盡事情。還再參酌。復召諸科道。勉以該言。即言。

七月督師袁崇煥斬總兵毛文龍於皮島。奏報文龍逆跡昭然。機不容失。便宜從事。席藁待罪。奉旨文龍靡餉冒功。通□有跡。事關封疆安危。閩外原不中制。不必引奏。

按文龍向為遼東參將。遼陽陷。逃至海濱。適有難民數千文。

原評云李亮之斬毛帥此  
計之最善也李亮成  
名聲著  
李朝所憚  
已臣之往繼及間以政表  
于辟者甯相國之謀事  
載李朝實錄而身食  
之後必以為表罪何哉

龍以術籠絡之同航海至皮島蓋皮島居遼東朝鮮登萊之  
中稱孔道文龍斬荆棘具器用招集流民通行商賈凡南北  
貨咸於毛處掛號乃得發不數年遂稱雄鎮又掠沿海零丁  
或指為奸細故稱臨陣斬獲以是積功官都督掛平遼將軍  
印逆賢時內奄出鎮各邊文龍疏請奄監其軍上即位嚴汰  
冗兵救下山東撫按檄登萊兵備王廷試往廷試受賄遂稱  
文龍兵馬可用絕無冒破文龍亦憚上英明思自立功名遂  
與□通誠願捐金二百萬易金復二衛地奏恢復功邀上  
賞已成約矣袁崇煥以督師出上召問漫以五年□為期  
及履任覘知毛有成約陰遣喇麻僧啖以厚利冀解毛約以

就袁□最重誓約堅持不可喇麻僧曰今惟有斬毛文龍在  
彼不為負約在我可以成功袁遂以閱武為名直造皮島大  
閱軍士毛置酒高會次日文龍謁袁亦置酒留宴酒半伏甲  
起稱有密旨即座上擒文龍斬於轅門外時崇煥布陣嚴整  
衆亦不敢犯毛部下千餘人散往他處餘衆悉就撫事定然  
後入告朝廷亦姑容之先是崇煥陞見入都閣臣錢龍錫叩  
以邊事答以當從東邊做起錢謂捨實地而問海道何也且  
毛帥亦未必可得乃崇煥云可用則用之不可用則殺之至  
是疏中即入錢語錢後竟以此得罪文龍既被殺袁疏請增  
餉三百萬謂五年之後遼事平并前所加各項皆可蠲除此

原評此時已有殺毛帥  
之議矣何以又云履任後  
覘知其有成約始以喇麻  
言斬之乎

一勞永逸計也。上令廷臣議，皆報稱不可。袁計窮，至十月遂致□兵入口矣。

九月二十六日，斬決重罪二十人。內田吉、倪文煥、吳純、夫梁、夢環、李夔龍皆逆案也。楊鎬、渠家禎、張翼明封疆失事也。高道素殿工侵欺也。故事，部開決囚單，必以民犯強盜叛逆及真正人命列於前，聽上勾決幾名而止。若官犯則列名於後。是年疏上，上御筆獨將後開逆案諸人勾決。先是中宮以皇子大慶請免行刑，上曰：生子固大慶事，誅有罪亦大慶事，當並行而不悖。旨下，政府揭抹面抹再三，上曰：不殺此輩，則逆案為無名。政府曰：此輩不過患得患失之鄙夫耳。上曰：既是患失，便可以無所不

至政府不敢言。時方久旱，行刑後大雨。

高道素督造桂王府第，侵欺錢糧無算。諸工俱潦草塞責，即棟梁皆極不堪者。一夕大風雨，後殿數帶俱傾，壓死宮眷百餘人。以後每遇風雨，王必露立廷中，深屢覆壓之懼也。上是勾及之，閣臣以為請。上曰：朕若出就藩，封就是只榜樣。高道素監造府第，使數百宮人死于非命，即寸斬道素，尚未蔽辜。又何請焉？道素自謂必無虞，沉醉出獄門，臨刑方醒。倉皇不能出一語，但連呼如此如此而已。

□兵從長城下大安口直抵遵化。時新令汰冗兵，被汰者謀作亂，至城下開門迎入。遵撫王元雅死于亂軍中，同死者知縣徐

澤以新任推官何天球已陞未去保定推官李獻明以查盤來教諭田毓齡守備劉聯芳時十月二十四日也遂破三屯營總兵朱國棟自縊山海總兵趙率教師兵赴援兵營于七家嶺猝遇敵全軍覆沒將攻薊州袁崇煥親帥部將督遼兵萬騎自山海直入薊州守護□因舍薊而掠三河豐潤玉田三屯馬蘭諸處有內守不堅而殘破者有邑令嚴守而無恙者其死難家恤者良鄉令黨還醇清河令任光裕也固安令劉伸蒞任方十日聞報先運藏倉庫身帶印篆出走家人被殺者二十口竟以城陷不狗問大辟監固安獄中十年方得遣戍命滿桂為武經略總理援兵諸鎮悉聽節制桂戰安定門袁崇

原評云似可減死

煥戰廣渠門殺其王子一人初袁自關門入援中外注望捷音迨駐兵郊外訛言繁興上意方急退敵待之有加禮召見文華殿自起慰勞呼以督師問禦敵之策賜御膳解上貂裘賜之又與祖大壽各賜盔甲一副及東便門之戰殺傷相當□鋒少挫督師兵亦疲甚有入城休息之請先是郊外徹侯中貴之園囿坟墓為賊兵踐踏毀拆各中貴因環訴督師責好不肯力戰上已心動疑矣及奏入上懼然心動復召對詰問良久言及援兵入城上聲色俱厲遂縛文煥下獄閣臣謂臨敵易將兵家所忌上曰勢已至此不得不然袁既下獄閑兵之在城外者闕然稱亂幾欲矢集城上命兵部從獄中出崇煥手書慰止之祖帥亦

竟擁其重兵颺去

揚士聰曰己己之變袁崇煥初至一戰人心始定迨後鈐制諸將不為無見而袁為人疎直於大璫少所結好毀言日至遂罹極刑厥後滿桂一戰而敗安見鈐制諸將為非宜哉乃京城小民羣然以為賣好而詈之矣袁既下獄遼兵東潰皆言以督師之忠尚不免我輩在此何為上乃出諭暫令解任聽勘而先入言深竟不可解矣

當本兵王在晉被譴後上召對羣臣陞工部侍郎王洽為兵部尚書洽山東人忼直無私援相貌極雄偉上私語云好似門神有術士即卜其在任不久以門神一年一換也至是□八十一

月十六日召對羣臣多言中樞備禦疎虞調度乖張先既不能預授方略今又不能整棚兵馬簡討項煜又引世廟庚戌故事云斬一丁汝夔將士震慄上遂下洽于獄以左侍郎申用懋代之陞口北兵備梁廷棟為順天巡撫起舊帥楊肇基為薊鎮總兵又起舊帥王威尤岱楊御蕃孫祖受出罪帥馬世龍於獄俱以原官立功

起舊輔孫承宗督師通州仍入朝陞見十月十五日至弘政門上即召入諭曰守禦百無一倖卿如何為朕調度承宗曰臣聞袁崇煥駐薊州滿桂駐順義侯世祿駐三河此為得策又聞尤世威回昌平世祿駐通州似未合宜上曰卿欲守三河何意承

原評云牧府謂公之赴  
通如通臣逐客其故  
言三矣時故府為韓滉  
州及錢李二公恐不五年  
而致文穆則力荐公去  
得非宜與先擢以爲  
已地乎

宗曰守三河可以阻西奔可以遏南下上曰卿即為朕調度京  
師承宗曰皇上当緩急之際不恤軍士性命而使之飢寒恐非  
萬全之策上曰卿言是卿不須往通面諭首輔草勅賜劍出朝  
上即周閱都城草揭回奏畢次日出閱重城乘月巡濠塹度險  
阻質明又奉後命口報逼通星馳通州料理蓋上意謂守近不  
如守遠故仍行守通初命也時倉場總督孫居相保定巡撫解  
經傳皆駐通州不受調度都城已傳通州三河等處皆失孫到  
通州遣人賚奏至上始喜曰通州固無恙乎即奉旨大小官員  
俱聽督師輔臣節制

孫承宗奏初三日通州守城者瞭見遼兵紛紛南下初四日知  
祖大壽全軍東潰自通州南二十里以趨張家灣渡河臣以守  
字慰大壽并傳一檄以撫三軍令游擊石國柱飛騎追之極力  
開諭軍校亦多流涕但曰主將已戮又將以大砲盡殲我軍故  
不得已至此國柱又前追而大壽已遠去矣時訛言大壽且與  
□合反戈相向承宗因密奏大壽危疑既甚又不肯受滿桂節  
制乘一軍驚駭又以放砲洗軍之說激而東潰非諸將卒盡欲  
叛也遼將大半為馬世龍部曲臣謹遵便宜行事之旨密遣世  
龍往撫苟見世龍必有解甲而歸者又密札諭大壽教以急上  
自列束兵殺賊以贖督師之罪仍許代為別白大壽得諭大哭  
其部曲皆哭乃如指還報而前軍已過永平矣

祖大壽率所統兵至山海關城南較場列營署鎮朱梅同監軍道王揖赴營勸其反戈自效言未畢衆兵擁大壽上馬奪關而出隨有馬世龍捧旨由正關出招諭多時大壽乃率諸將叩頭世龍即諭之云諸將既感聖恩當鼓全旅進關再選未去馬步萬餘以繼後用保宗社則聖恩可酬督師可生汝等可成千古人品否則終於大義未安委曲撫導諸將皆悅大壽乃受約束暫歸信地承宗亟使世龍報命隨遵旨移駐關門防守

渴桂勇悍敢戰而矜已自用督諸將出陣軍無號令不能約束以十二月十六誓師而南十八遇敵於盧溝橋一戰而全軍殲焉桂與孫祖壽皆死之黑雲龍麻登雲擄去黑後於四年九月

反正逃歸上獨念渴孫二將血戰捐軀命禮部官出城致祭并查子孫優恤

庶吉士劉之綸金聲俱上疏請纓自效并荐奇士申甫可為大將上即陞之綸兵部右侍郎為戎政副協理申甫特授副總兵捐內帑十七萬聽其調度召募改金聲為御史監其軍然甫寔游談無寔所習僅役鬼之術所募兵皆無賴子十六日統兵至良鄉與敵遇所造車不可用試術亦不驗所統七千餘人俱敗事聞命棺斂給卹金聲亦未出城得免于難之綸以三年二月帥師至遵化遇敵自永平回合兵冲殺前兵既劒敵即遣官招降之綸不屈力戰而死

原評云國權主事史維  
堡唐昌世下獄姓名五異  
不言廷杖

原評同六入內省之言

此山西流賊之始也陝西賊之起  
詳到自崇禎全帛錄  
大略丁卯陝西大旱流賊初  
名張耀采催科甚酷有三二  
名劉勳乃人聚山上置壘面曰誰  
敢殺耀采巡按胡廷宣老而  
老實不問又延慶崇禎早有三  
名名曰倡亂子府谷葛勇延桂西  
漢以南此流賊之始也

上以城守潦草下工部尚書張鳳翔於獄管工司官長洲管王  
音岷山許觀吉四川周長應上海朱長世俱廷杖八十臨時閣  
臣合詞祈請寬宥上曰目下與敵止隔一牆宗廟社稷都靠這  
牆若這牆一倒宗廟社稷都沒有了豈可不重處時許周朱俱  
斃杖下張管贖徒

山西巡撫耿如杞率兵五千人入援皆勁卒也最先抵都城下  
兵部即調守通州明日又調守昌平又明日調守良鄉功令兵  
到初日不准開糧次日到營汎地方乃准開糧西兵連調三日  
皆不得糧既餒且怒遂沿路搶掠耿以不戢軍士逮問大辟次  
年棄市耿在天啟年間官薊州兵備以不拜逆璫生祠為撫臣

劉詔誣劾問辟幸遇上登極赦罪復官即超陞巡撫僅越兩年  
竟得罪死西市深可痛也自如杞逮後五千人哄然各散潰歸  
山西而晉中流賊從此起矣

內外城守以一退往三河一帶方少寬二十六日夜刑部獄囚  
盡逸幾為大患次日城門復閉為捕囚也刑部奉旨時方戒嚴  
獄囚逃逸典守官所司何事尚書喬允升侍郎胡世賞提牢教  
繼宗俱革職着錦衣衛監禁

元年枚卜一事以烏程許虞山故遂高閣不行至是蒲州將乞  
休力請點用十一月初六遂欽點大名成基命改名靖之入閣又於  
十二月二十一日特用宜興周延儒會稽錢象坤桐城何如寵

原評老成持重  
云多所作為拔時不孔棘  
中樞束手無策亦云老  
成持重又安在也

蒲州忠厚拘謹不能仰副聖意。騎既退中書原抱奇遂出疏  
參首輔與袁崇煥通謀誤國右庶子丁進以陞轉愆期亦出彈  
章工部主事李逢申繼之蒲州遂請告回籍其禮尚從優厚云  
抱奇固貲即不足言丁與李皆蒲州已未所取士也丁奉旨以  
陰陽閃爍降二級李以監督火藥失事下獄遣戍蒲州後以北  
兵破城死難其事未詳故失記

上時銳意功業本兵申用懋老成持重無所作為梁廷棟智巧  
人也初自邊道超陞巡撫旋進兵部尚書督師薊通為上所倚  
任三年正月初五日内旨申用懋着解任回籍梁廷棟回部管  
事

○兵雖東歸復破永平灤州盤踞不退永平鄉官白養粹首先  
迎降獻女以行媚孫閣部率師東行嚴檄各將共攻灤永有舊  
永平兵備張春素得民心曾練有鄉勇二萬皆精銳可用逆璫  
時張春被劾罷歸鄉勇皆散至是復起春為太僕少卿整飭永  
平兵備永民間之皆率先來迎向所練鄉勇亦皆來會軍聲大  
振四川永甯兵備劉可訓甫破安酋奏捷遂率勝師入援兵部  
司務丘禾嘉以監軍入祖大壽幕激以忠義於是各帥起營直  
薄灤州張春劉可訓馬世龍等皆身被矢石誓不反顧。見勢  
逼遂開東門而出而灤州告復永平城中聞灤州既復咸有叛  
志。既擄掠滿志復見城中心變一夕屠城而去所存者十之

原評云時先復還安而  
深亦遭次第恢復亦嘗  
攻也

四五而已大兵入城白養粹已死其母尚存張春先至盡封所  
有而出絕無染指世龍盡取之大壽至空無所有遂將白母用  
嚴刑乃盡出積藏蓋幾百萬云餉司陳此心鄉紳郭鞏俱以剃  
髮投降逮問鞏固逆案問徒向以首媚魏璫為周忠毅參論者  
也至是始以大逆論斬先是遵化之破有原任兵備賈維鑰率  
衆投降即授偽巡撫之職至是亦同擒治正法凌遲并同事十  
人俱傳首九邊

隆萬以來除海忠介外從未有以乙科躋節鉞者庚午恢復灤  
永後陞四川付使劉可訓巡撫順天兵部司務丘禾嘉巡撫山  
山永係新設前屯兵備孫元化巡撫登萊漢中兵備劉應遇巡撫

甘肅皆乙科也一時共得四人丘以九品末郎直躋中丞尤屬  
異數自後超用甚多至陳新甲直正中樞之席然究無一人建  
功立節足副破格之特恩者

三年二月初十日册立皇太子。上以戒嚴免升殿百官聽宣勅  
於午門外行十二拜禮。賜三品以上及日講各花朵紅一足。三  
品以下皆半紅花枝用角。日講官紅全足花枝用銀加恩。輔臣  
及督臣皇親周奎及司禮監有差。禮部尚書李騰芳加太子少  
保。儀制司郎賀世壽陞光祿少卿。

袁崇煥逮問後御史高捷疏參錢龍錫即指袁疏中輔臣錢某  
相商之語指為同謀時同志者勸錢於辨疏中當痛言一番明

原評檄山先生極政  
時務未見經濟此品  
地最巨似未可少也

主可為忠言而錢竟不能從也引罪疏甫奉溫旨隨即入閣高捷再疏遂得旨着致仕至是方悔不用前言則已晚矣

御史史堃高捷袁弘勳三人皆附楊維垣力持黨局方璫勢初敗維垣既斥三人連疏參劉鴻訓之持正票擬又力阻舊輔韓爌之召用以此得罪公論奉旨革職時主票擬者錢龍錫也迨劉以改勅事敗冢宰王永光遂力為三人求復官科道交章論之上方注意永光竟因其言用堃捷三人弘勳則令俟勘問事結另擬時弘勳又以賄賣舉人事被參劾也適遇邊警袁崇煥以通款下獄二人遂與永光合謀借崇煥以報龍錫因錢以及諸人亦成一逆案為翻前案地溫體仁主之欲發自兵部尚書梁廷棟初以外任

任被特簡懼上英明不能遽起大獄不敢任其事韓卒以此去錢竟逮下獄問辟

刑部越獄之變奉旨拏尚書喬允升侍郎胡世賞提牢教繼宗於錦衣衛時內外戒嚴故上怒甚欲重懲之至次年三月初十日御講筵講臣文震孟進講君使臣以禮章勸上培養士氣推心感人勿徒峻刑法以啟猜疑語極剴切上為改容傾聽講畢退上傳諭講臣暫留初疑有所召對後殿門俱閉退至閣中則聖諭已宣付閣臣釋諸臣送刑部乃知諭留講臣俾即見諸施行也

諸臣既下刑部尚書韓繼思復以勘問從輕革職矣更命都察

察院易應昌定罪易擬以法止當杖屢旨駁問易執奏再三上大怒下易錦衣衛司官徐元嘏廷杖五十棍後部擬喬以年老篤疾准遣戍胡擬杖教亦遣戍

易既下獄錦衣衛奉嚴旨打問兩次以為斃法底私無人臣禮令法司從重擬罪部擬易罪以寬擬喬允升今允升已從寬論戍應昌之罪亦不能加又奉嚴旨以允升自以老病減等應昌違制徇私當依律加等論不得借以求寬再駁再問竟坐大辟繫獄時京師雷雹大震會審之日雷擊審官案於是上警悟緩其獄并停天下行刑至次年始以天旱齋禱方得釋放

崇禎朝紀畧卷二

江上遺民李遜之輯

四年正月 日召廷臣及各省監司官於平臺上召浙江副使周汝弼問浙閩相去海寇備禦之策汝弼曰去秋寇犯海上五日即去問江西布政何應瑞宗祿何以不報應瑞曰江西山多田少瘠而且貧撫按查覆有司尚未報耳問湖廣布政杜詩爾楚去夏民變樹幟何也詩曰樹幟之後地方仍安問福建布政吳暘陸之祺海寇備禦若何暘曰海寇與陸寇不同故權撫之上曰李魁奇何又殺之暘曰魁奇非鄭芝龍比即撫不為我用今鍾斌亦反側不可保上問實計安在之祺曰多練鄉兵多設

火器以戰為守此上策也問河南布政楊公翰賈鴻洙以有司收稅耗重宜叅來處治鴻洙曰近已革去矣問山東布政陳應元焦元溥曰爾省負宣大兵餉數十萬何也應元曰近已解納問其數曰七千兩上少之曰宣大重鎮需餉甚急其毋玩問山西按察使杜喬林流寇披猖是否盡係秦寇喬林曰寇在平陽或在河曲須大創之但兵寡餉乏耳上曰前報已蕩平何復生發喬林曰山陝界河條來故河曲被困問河曲之陷對曰失於內應問勾引河人對曰大抵出于飢民間陝西叅政劉嘉遇寇與飢民相煽地方如何料理嘉遇曰寇見官兵即散退復嘯聚上曰寇亦是赤子可撫即撫之對曰今方用撫上曰前王左掛

子既降何又殺之對曰彼雖受撫仍行劫掠是以殺之問近日情形如何對曰一在延平一在雲岩宜川問廣東布政陸問禮曰爾已陞南贛巡撫了該地方多盜若何對曰南贛在萬山中接壤四省當行保甲練兵上曰此須實做問廣東海寇若何問禮曰廣東多至自福建舟大而多火器只是把守海門勿容登陸方不為害問廣西布政鄭茂華靖江王府爭繼事若何茂華曰憲定王二子履祥履祐祥早沒王請立祐為世子而祥有未奏選之妾生子今已長是以爭王位久定未敢輕議問四川布政華敦復鄉紳挾制官府事若何敦復以欠糧對上曰守臣何不彈壓敦復曰遠方州縣多科貢故不能時雲南布政婁九德

已經劾處問貴州布政朱芹安位撫事如何芹曰督撫責安位  
四事一擒奢酋自贖已獻樊虎奢寅妻馬氏一責送撫臣王三  
善樞已送出一責修理九驛已漸報完一責削地安位不能從  
故議未決對畢召各官諭以正已率屬愛養百姓用命有顯擢  
如或有貪贓壞法國法嚴明決不輕貸諸臣叩頭先退又召左  
都閔洪學副僉張提高弘圖諭之曰巡按賢則守臣皆賢若巡  
按不賢其誤事不小屢諭回道須嚴考核以後斷不可輕徇又  
曰卿與吏部實心任事天下不難為諸臣承旨退

日講官文震孟奏臣見群小合謀欲借邊才以翻逆案雖聖意  
持之甚堅奸党圖之愈急故于子語魯太師樂章願皇上剖晰

是非辨別邪正蓋一音雜而衆音皆亂一小人進而衆君子皆  
廢天下容有無才誤事之君子必無懷忠報國之小人今有平  
生無恥慘殺名賢之呂純如且藉輿援而思辨雪又見王永光  
無事不專而濟之以狼發念必欺而飾之以詐深計巧設無所  
不中變亂祖制擯斥清才舉朝震恐莫敢訟言臣下雷同豈國  
之福故於五子之歌章言識精明則環而向者莫敢售其欺心  
純一則巧於中者無所投其隙為此語者實憂治危明之極思  
願大小臣工當視國如家除克雪耻不當分門別戶引類呼朋  
也奉旨寓規時事知道了所指呂純如慘殺名賢年例變制等  
語着據實奏明震孟回奏純如為福建守道諂媚稅監高家周

順昌時為福州推官，剪除稅棍，純如恨之。後純如投身逆璫，躡取節鉞，順昌訟言攻之，遂純如遂挑巡撫毛一鷺，構成李實之疏，而順昌被逮，慘死矣。其致死之由，全出於純如。今當先上疏求雪，恃有吏部尚書王永光為之奧援，故首倡邊才之說，而純如之疏即繼之，呼吸通靈，提掇如響。至於會推年例，吏科都給事中陳良訓，誰為開送商訂，不過以其稍秉公道，每事叅駁，乃借外轉以除碍手耳。至考選新資，度無所施，其籠絡乃獨斥一才名素著之陳士奇，而十年冷署之潘有功，亦以猜疑見棄。大臣之心術如此，亦不忠之尤者矣。永光疏辨前閣部定案時，臣被言註籍，純如入案，臣不及知，何自援而出之。至借邊才以翻

逆案，或指王之臣一事，然之臣在三等之列，從考功一法，註有涉歷邊疆，稍寬一點之語，何嘗必欲借之。必欲翻之，至陳良訓濫廁首垣，與參廷議，人言嘖嘖，夫豈無因。至考選過堂十六人，內選授科道十四人，部屬二人，此二人單各有人，徒以前途正遠，因才儲用，期待殊不薄也。時永光已密結大璫為之地，謂文有私於三人，於是聖意拂然，內批遂有挾私牽扯，不堪講官之語。閣臣揭進為講官，存體改批云：講官循職，自可敷陳，不得任情牽詆。此疏在三年，因序王永光事，故并書於此。

呂純如，吳江人，天啟中任侍郎，護送惠藩之國，其復命疏於護送太監劉興趙秉彛皆極揄揚褒美，有云：其愛地方

也。即一草一木之恐傷其自愛也。又一新一水之若浼仁聲。遐布清節可師。至歸美逆賢。一則曰。廠臣之選才良。再則曰。廠臣之率屬嚴云云。此係邸報抄傳四海共睹。當鼎湖之位。純如現任佐樞密。弄神通。潛行改換。乘邊警方息之後。擬借邊才以翻逆案。王永光等為之與主。純如遂首先上疏訟寃。謂復命疏未嘗歸美廠臣。不當列名欽案。且引聖諭云。須有憑據。不許借題。又謂紅本在御前。副本在通政司。抄案在禮科。其時為天啟七年九月。必有說謊以欺諸臣。因說謊以欺皇上。臣姑不盡言等語。通政章光岳即為封進。時呂氣焰張甚。言路盡暗。故文文肅特出疏糾之云。

當永光於天啟癸亥任南總憲。比匪范得志。參處南臺。王允成李希孔因得罪。公論先忠毅時。初任西臺。特疏參其陰陽閃爍諸奸狀。永光始以病歸。至乙丑春。逆璫既逐。諸正人去。崔呈秀徐大化薦之起位大司馬。即有兩疏頌璫。四海抄傳。邸報共睹。丙寅以天變修省。司屬王陞張履端二人力勸其疏救大獄。因之去任。然非彼意也。崇禎元年起位冢宰。獨護持璫局。至上命同輔臣。據發出紅本。定逆案。諸臣永光因已亦有疏在內。力為諸人庇覆。以自為掩飾。地廷臣交章劾之。以為永光身係頌逆之人。不可以定從逆之案。又言永光為逆臣。崔呈秀徐大化諸人所薦為正人。李應昇所叅邪正已自了然。今雪消現見終抱。

狐兔之悲。雖換面改粧。尚存鷹眼之疾。等語。前後參論者。如吳  
姓。張國維。陳良訓。李長春。王繼廉。毛羽。健馬。鳴世。顧其國。王象  
雲。王永吉。張繼孟。公疏單疏。幾有百餘。永光既以年例。籍制科  
道。復薦起。史莖。高捷。袁弘勳。以為羽翼。又因邊警。謀翻逆案。則  
荐呂純如。王之臣。之邊才。故文公於講筵中言之。又再疏論。糾  
賴上英明。堅持之。不能動也。至辛未三月。科臣葛應斗。糾袁弘  
勳。受叅將胡宗明。主事趙建。極私賄有據。二人皆永光私人也。  
兵尚梁廷棟。亦發弘勳與張道濬。招權納賄事。弘勳等俱下獄。  
論成。吳執御。復論永光。誨貪崇墨。奉旨詰責。永光始認罪去位。  
則宜興當國。已悟其奸邪。驅而遠之矣。

蔣允儀曰。始永光與烏程比。陽附宜興。其實兩人自相為黨。  
用一人則居功於己。黜一人則委咎於內。宜興不覺也。辛未  
春。宜興以主考入闈。兩人在外。遂顯然示異。且以兩年不協。  
公論事。俱歸咎於一人。如薦之臣。純如事。絕未嘗謀之於周。  
而告人則曰。首輔意也。宜興出闈。覺之。適上詢及之。臣可用  
與否。宜興即對曰。若以之。臣閒住者可用。諸與逆案者俱可。  
賜環。而忠賢呈秀。亦可漸次昭雪矣。上乃大悟。堅執如初。蔣  
公丁丑年。又序先忠毅疏稿中一段云。首擊僭逆者楊忠烈。  
繼之者仲達也。首擊貪逆者高忠憲。代草者又仲達也。若夫  
有一人焉。當清明之時。執澄汰之柄。以好惡之拂。逞淆亂之

私初怵嚴威名討逆而實庇奸一經邊警輒借題而謀翻案  
流毒至今尚未有底而仲達袖中彈文獨發于數十年之前  
吾知應山梁谿兩先生亦必以獻可先見讓仲達以易名之  
先愧仲達矣 數語皆指論永光事也姚文毅公謂先忠毅  
有山巨源郭汾陽之先見也亦以此云

長垣既去御史水佳胤疏攻梁廷棟顯為袁張報復又發其私  
人沈敏與薊撫劉可訓往來諸奸狀下部獄則梁實授之以隙  
且實有暮夜之踪梁既不免禍幸中涓左右之得旨閒住於是  
與長垣俱不能忘情於宜興矣烏程又用其私人閔洪學為冢  
宰一時捷足者竟附烏程而搯戈向宜興宜興頗危沈敏者紹

興人同志說宜興即以沈同鄉連及烏程并去之宜興唯唯給  
事王績燦等先後疏攻烏程與閔宰宜興稍定復飲烏程狂  
藥謂決不相負於同志舉動不能炤管幕客張捷賀世壽知宜  
興不足謀皆轉入烏程幕以所謀告之烏程因恨總憲陳于廷  
宮詹姚希孟刺骨至五年三月兵部華允誠疏叅溫閔尤激切  
疑疏出姚手遂訟言排抑姚以主北闈試為兵科王猷疏叅武  
生冒籍事猷為袁弘勳門人理正宜查冒籍與否與衡文者無預閣中

乃票覆試內一名高岱以不能完篇黜革正副考俱下部議處  
初部覆疏上上意頗注烏程密揭入而聖心變遂降二級姚以  
少詹掌南院行矣陳以考核御史畢佐周等廷撲武弁事不稱

旨革職為民事在五年六月九月初七日上召群臣面諭曰  
遼東十數年不見平袁崇煥以□自任朕遣兵湊餉無請不  
發不意專事欺隱以市米則資盜以謀款則斬帥縱□入犯頓  
兵不戰援兵四集盡行散遣及□薄城下又潛携喇嘛軍中堅  
請入城敕下法司定罪依律家屬十六以上處斬十五以下給  
配朕今止流他子女妻妾兄弟餘釋不問群臣咸頓首無言上  
即將紅本付刑部官承旨先出上又曰崇煥罪惡諸臣如何從  
無一言指斥共為欺罔又曰此番警報朕與諸臣俱有罪諸臣  
叩首謝是日磔崇煥於市初錦衣衛具獄詞株連甚多上俱不  
究獨以史堃高捷言錢龍錫密謀主款命革職擬罪

刑部會議奉旨謀款行私朝廷若無主之者邊臣何敢行錢龍  
錫與袁崇煥面商島事即有入軍斬帥之語明屬同謀着錦衣  
衛差官旗扭解來京究問龍錫既逮到辨無同謀斬帥與私書  
主款之事且引首輔韓爌為証再下部院會議奉旨云逆督謀  
款擅殺導□流殃龍錫寔與同謀先即面囑後又書訂至于面  
奏庇護尤屬狡欺會讞允確着監候處決又批刑部疏以科道  
官都無一言反借名建白佐款長奸毛羽健毛九華王應斗分  
別遣配詞臣黃道周疏畧云竊見錢龍錫對簿法庭頭搶  
獄吏群然相視啞無一言此書傳所未見也世宗決意棄河套  
心疑開覺撓玄修故一旦破法而誅夏氏今東疆之圖未有定

筭恢復之計。上下持疑。獨斷然決意于一。累輔既乏。斂棋引杯之致。廷臣又無蹴翁齒馬之嫌。遂使三台灰溺於貫城。斗柄銷光于謹室。衣冠相語以目。不曰那敢言。則曰那得歸。人心如此。誰復挺脊梁。擔安攘之績者乎。巷議謬愆。謂殺罪輔為毛文龍報仇。如此則邊將必驕。閣臣權絀。故殺一閣臣為文龍報仇。則可為劉興治樹幟。則不可為邊臣示前車。則可為閣臣作後阱。則不可。陛下御極以來。輔臣負重譴者九人矣。一代之間。寧有幾輔。何必囹圄憤盈。孤卿駢首。令傳者謂獄吏甚貴。士紳甚賤乎。且東江方驚。決無誦毛帥以鼓劉帥之理。奉旨龍錫罪案。原與文龍無涉。何稱代為報仇。本朝不設丞相。疏內援引不倫。至

棄河套。撓玄修。豈臣子所宜言。且妄稱夏氏是為何語。着回話。道周再疏言。臣恐邊臣藉口。閣臣則帷幄之猷。不壯。故因邊計而引東江。因東江而及毛帥。因閣臣而引及宰相。思古宰相無遙制之實。而收遙制之功。今閣臣無宰相之名。常受宰相之禍。有此兩意。滯于胸。故倉卒屬筆。奉旨責其支飾。降級調用。至四年五月。始以天旱修省。因科臣劉斯埭。又有疏請宥。始釋龍錫於獄。遣戍定海衛。

夏允彝曰。錢初出獄。宜興過候之。極言上怒甚。挽回殊難。錢甚德之。次日烏程至。錢述周語。致感。烏程曰。上固不甚怒也。錢遂信溫質直。而周虛偽。不知實溫之巧於擠周。以自見德。

也

袁崇煥既誅有東江舊弁周文煌具疏為毛文龍訴冤奉旨云  
逆督擅殺島帥罪案已定毛文龍歷年糜餉牽制無功豈得乘  
機借端希叨忠義周文煌奏不倫本當重處念係愚弁姑饒  
他觀此旨始知殺袁為毛報仇者非聖意也又有義士許俊上  
疏為袁頌冤云某日提兵至京營于某處發火器矢石斬首若  
干又某日于某處斬首若干若云款云勾則三日所得首級何  
來若云不戰為退血則後此能戰者何人疏入下部擬其人謫  
戍復上疏曰崇煥若通□賣國則臣為逆黨當與袁同誅若袁  
非賣國則臣言無罪謫戍非律疏入亦不究

原評快論

原評社火截來跡此也  
未確

湖廣撫按奏三年五月初二日有沔陽州卿官譚世講焚死據  
州申稱百戶趙欽因訪察事本官暗假他人名告陷押解按院  
世講先捉欽歸狠毆是夜欽潛入譚家見世講在堂飲酒扭住  
不放世講家人即放火截其來路不意天意反風倒燒房屋欽  
因將世講殺死投屍火中合州士民幸之群起為難捕官登城  
愕視至次日豎白布旗上書四十三里軍民人等被害報仇等  
語又奏六月初一日鍾祥縣申報道旁豎有紅旗上書九關七  
反招賢令七字一時承天襄陽荊州武昌岳州所獲紅旗或教  
場或衙門上書七字相同

原評此淫寇之跡也

譚本甲科歷官潦倒曾謫任江陰縣教諭貪戾之狀至今傳

之宜其居鄉暴橫致罹慘禍而亂民之起卽是流寇三楚自此騷動矣

日講官羅喻義進書經講章惟我商王布昭聖武一節中及時事有左右之者不得其人句頗傷政府正講寥寥數言後講聖駕大閱似一篇長奏疏又多用列聖廟號恐鞠躬頻頻不便烏程寔志其隱刺借餘為詞使正字官傳改羅難之正字請羅至閣面商比至閣門烏程坐房中高呼他事久不出迎羅待久之懷憤直至閣中隔板相誚前此未有也烏程遂具疏叅云舊例惟經筵進規多於正講日講則正多規少今喻義以日講而用經筵例駁改不聽乃下部議處部覆云聖聰天縱而喻義曉曉

多言遂以閒住處之在溫不過借題處羅耳若如部議安用講書為也可謂一一諛 羅後家居以寇禍死節

四年九月命太監張彛憲總理戶工二部錢糧唐文征提督京營戎政王坤往宣府劉文忠往大同劉允忠往山西各監視兵餉十月命太監王應朝往關寧張國元往薊鎮東協王之心中協鄧希韶西協各監軍十一月命太監李奇茂監視陝西茶馬吳直監視登島兵餉初上既罷內臣外事俱委督撫然上英察輒以法隨其後外臣多不稱任使者二年京師戒嚴乃復以內臣監視行營自是啣憲四出動以威倨上官體加於庶司蓋群相壅蔽矣

從來文試有會試廷試有傳臚禮武場則否四年武舉試有董某者以勇力聞先達上聽時主武試者詞林楊世芳劉必達董以策不中程被格上謂諸臣故拂聖意也下兩主考及監試御史余文燿馬如蛟於獄命改期重試另點方逢年倪元璐主試令內臣監視於十月廿三日首場試技勇廿五試馬箭廿八試步箭初二試策論初七揭曉初十傳臚悉照文場事例特拔王來聘為狀元賜宴兵部命閣臣主席自此遂為故事

十一月廿四召對群臣於文華殿先召戶部尚書畢自嚴問錢糧舊加派若干新加派若干自嚴對舊五百餘萬新一百六十餘萬上曰援兵未出之先稱出浮於入者一百餘萬援兵已撤

如何尚未入完自嚴對前此積欠甚多上曰上緊催督還須從長打算按月給發召兵部尚書熊明遇問各邊新兵若干養兵要為有事之備須是守也守得戰也戰得今日果能守得麼明遇對還是守得的又諭戶兵二部須是同心做一家事不可爭執召左都御史陳于廷諭以御史考核須嚴考核嚴自然盡職天下自然無事了又召文選司蔡奕琛李元鼎職方司李繼貞王茅諭以文武各官俱是爾等經手推用必須得人因問奕琛用劉宇烈憑何推他邊才奕琛奏科道荐舉上曰只要肯做熟手做得生手也做得方一藻是熟手麼奕琛對以邊才寔難望稍寬文法上又問劉源清何以推山海總兵總貞對源清恢復

有功且現在薊鎮就近推補又問三屯總兵王維城何如人繼貞曰亦是恢復有功又問張國振繼貞對國振原係陪推皇上點用上曰正陪俱要堪用繼貞曰年來邊事查點愈多使費愈煩上曰畢竟官不廉官若廉吏胥豈敢作弊又召吏部尚書閔洪學等俱出班跪上曰諸臣公疏遣用內臣太祖明訓朕豈不知只成祖以來也有間用的皆出一時權宜其天啟年用的朕且撤回豈如今反用朕何嘗不信文武諸臣年來做事不堪萬不得已權宜用他若諸臣肯實心任事要撤也不難即如馬政一節如何解馬不堪即行變賣這等解他何用有言海禁當嚴前要孫元化奏他便說禁海須撤島明是不肯實心做事要督

撫官何用又重申再三曰文武官肯齊心替國家做事這內臣要撤也不難

開封推官張瑤杞縣知縣宋玫各有才名張負氣不為人下辛未考選同鄉宋鳴梧父子在科其門役有所需索張不與更罵之宋不悅及考選以玫為吏科黜張為同知張因揭玫賄營及倩人代書情弊奉旨覆試而宋卷已潛易矣宋如故張遂降州判孔有德陷登萊張殉難玫亦以壬午之變不屈死

十二月考選科道後更核在任錢糧完欠於是給事熊開元御史鄭友玄俱以完不及格謫調并責戶部尚書畢自嚴不行糾舉革職下獄吏科顏繼祖疏救上并切責之自是考選將及必

先核錢糧不問撫字專於催科而戶曹胥吏俱得以捺官評之短長矣畢固先朝名碩然年齒已衰錢糧繁劇非所長也先已屢疏請告不得竟致負重譴而去公論惜之

五年壬申四月兵部員外華允誠上三大可惜四大可憂疏言當事者<sup>借</sup>皇上剛嚴而佐以舞文擊斷之術借皇上綜核而騁其重逋握筭之能以皇上圖治之盛心為諸臣鬪智之捷徑可惜者一人臣展采止此精氣今以窺微指為盡忠摘細瑕為快意直指風裁徒徵事件長吏考課惟問錢糧以多士修職之精神為小夫趨辦之能事可惜者二廟堂不以人心為憂政本不以人才為重四海漸成土崩瓦解之形諸臣但有角戶分門之見

以興邦啟聖之日為即聾從昧之景可惜者三國家所據以總一天下者法也王化貞已與楊鎬異辟余大成與孫元化并逮使輕猾者不以捍網為惧矯矜者且以對吏為榮刑罰不中斧鉞無威可憂也國家所恃為元氣者公論也直言敢陳之士一鳴輒斥指佞存賢之章非訐則黨是非共蔽忠讒互淆可憂也國家所賴以防微者羞恥也大臣握重權而有徒隸之心小臣惟望氣而鮮特立之操中使一遣妄自尊倨與之抗者二三人耳其餘奔走期會諂曲趨承貪競成風羞惡盡喪可憂也用人之職吏部掌之閣臣不得侵今次輔與冢臣以同邑為朋比惟異已之驅除統鈞大臣甘作承行之吏黜陟大柄祇供報復之

私皇上惡諸臣之欺擅欺莫欺于此擅莫擅于此矣疏上責令  
回奏又極言溫體仁閔洪學比交為奸私沈演唐世濟等上怒  
命奪允誠俸一年

浙直巡鹽祝徽廣西巡鹽畢佐周各以戒責武弁奉旨都察院  
叅看以會典軍官等樣具奏方許取問豈得三品軍職擅行懲  
責掌院陳于廷覆疏歷引憲綱有戒飭之條謂非自兩人始且  
言外衛諸武官目不知詩書口不誦韜略無弓馬之長技無過  
人之膂力家居則武斷豪橫委運則抗延侵欺有司不得司其  
長短惟巡方啣天子之命有戒飭之成憲創一警百暴橫知戢  
且所犯細故若必一一奏聞天威懼其或褻隱忍則又長惡不

悛天下之衛官將益其驕肆莫可誰何矣奉旨軍官不許擅自  
勾問律例甚明且敕書亦無懲責字面再行駁議于廷堅執于  
初至第三疏回奏遂奉旨以徇情市恩革職為民時上方有意  
重武抑文烏程又從旁譖之故以總憲重臣遽遭嚴譴陳在天  
啟朝與趙楊高諸公同事以忤逆璫被逐至此復以抗節不阿  
得罪去國益見大臣風節矣

工部侍郎高弘圖言臣部有公署中則尚書旁列侍郎禮也內  
臣張彞憲奉總理兩部之命儼臨其上不亦辱朝廷褻國體乎  
臣今日之為侍郎侍尚書非侍內臣國家大體臣不容不慎故  
謹延之川堂相賓主而公座毋寧已之雖大拂彞憲意不顧也

且總理公署奉命別建則在臣部者宜還之臣部豈不名正言順上以軍餉事重應到部驗核不聽弘圖遂引疾求去疏七上竟削奪前後論內臣不宜遣者南北諸臣如呂維祺李曰輔吳執御魏呈潤金鉉馮元颺周鑣不下數十疏疏上或降或黜今錄其疏語剴切者摘錄一二於後

工部主事金鉉疏云昨見太監張彛憲牌開本監公署已完擇十七日上任兩部司屬官吏等謁見炤部堂體制行臣不勝駭異是明欲驅清署之臣屈膝于奄寺教諭中曾有是乎彛憲銜猶司禮職則監視原與巡視體制相等惟貪墨侵欺一體覺察若抗顏昧心妄自尊大以皇上廸簡之臣子令其罄折偃僂置

自有之堂屬別行僭妄之儀去不易之公庭強抑刑餘之下從此結納奔趨彼則日驕此則日諂干憲典而壞士風可勝言乎工部馮元颺疏言聖諭以張彛憲總理戶工事務諸臣單詞合詞爭之而不能得夫爭之而不得惟在諸臣深體而善承之遠必無犯祖宗交結之條近必無負皇上釐剔之意皇上以為內察外其弊可得然苟不先為無弊則其弊終不可得臣以為其道莫如禁交謁蓋有交謁則有酬酢有情面情面漸熟格套彌堅乞立垂嚴禁凡在廷諸臣並不許一至內臣之門識內臣之面內臣既別立公署亦不得造兩部之室與部臣密邇若部臣錢所關灼有弊端內臣即得糾叅若其循職奉公自關人臣分

內內臣不得荐舉不然本欲剔弊弊乃愈滋使外臣冀內臣之不來以自便私圖猶可言也使外臣冀內臣之來以群為蒙蔽不可言也

南京禮部主事周鑣言內臣用易而去難此從來通患然不能遽去猶冀有以裁抑之今但見因內臣而疑廷臣者屢屢矣因廷臣而疑內臣者無一焉如張彛憲用而高弘圖之骨鯁不可容矣金鉉之抗直初雖免究竟以他事中之矣王坤用而魏呈潤以救胡良機處矣趙東曦以直糾扶同處矣鄧希韶用而曹文衡以互訐投間矣王弘祖以禮數苛斥矣若夫孫肇興之激直李曰輔熊開元之慷慨無不罷斥未能屈指每讀邸報半是

內臣之溫綸從此以後草菅臣子委襲天言祇徇中貴之心將不知所極矣嗟乎紹璫雖巧佞祇是宮闈之趨役簪纓雖迂戇終屬帝王之心膂願皇上之深思也疏入奉旨削籍禮部員外袁繼成救之不聽

薊督曹文衡慷慨任事勁直不阿與總監鄧希韶抗不相下具疏互訐因稱病乞歸奉旨着彈力幹濟以副委任科臣黃紹杰因有監督不和疏云古來未有反顏相視猶可覲面共事者母論掣肘當前雖豪傑不能展手文衡以節鉞重臣慷慨烈士無因而受監軍之點綴將何顏立于三軍之上猶責之以任事可乎然文衡去而監視益不宜留何也此番玄黃人人囁息若欲

委蛇附和必非文衡之人而後可不然肯以鼻息仰乎則有監  
視必不能容督撫明矣且廷臣向所慮者不止此今皆已肆然  
無忌矣祖制不容典兵廷臣言之頃且幾于立標營窮地不堪  
騷擾廷臣言之今已穢迹自敗露廷臣言仗節負氣之士定遭  
毒螫今果伎倆遞見矣廷臣言寡廉鮮耻之夫將開諂附今果  
有嘖嘖稱頌甘為薦主門生不奉旨而擅發營兵者矣前轍非  
遠漸何可長世界至此寧不寒心同時御史宋賢又有疏劾山  
永巡撫丘禾嘉云皇上遣內臣監視原屬權宜無奈小人逢迎  
無所不至若馬雲程請兵自衛丘禾嘉先為派定六百名猶自  
歉不能措置其吮癰舐痔之意可見乃部覆議請而禾嘉復為

之請必欲以兵柄授之殷勤若此不可羞哉御史高倬又有監  
賢相構可虞疏皆奉旨議處文衡因復具疏為言官求寬不聽  
未幾曹終以間住去

豐城侯李承祚天啟年間兩疏稱頌逆璫功德請如中山王例  
封兩公並列兩都璫磔後定逆案議大辟繫獄矣其子上疏引  
八議乞寬刑部疏亦為之地給事中吳彥若有疏論之上手批  
諭內閣云此案情最可恨法原當誅但世勳與流官有間券文  
難泯據部疏議革爵遠戍足抵一死否閣揭因為之力請引券  
文免死之條遂改從寬典然上意極嚴附逆雖追念世勳稍開  
一面捧誦御札凜於爰書矣是年逆案劉詔與失陷封疆之王

化貞俱棄市。勲臣中又有襄城伯李守綺、靈璧侯湯國祚，皆有疏頌奄，竟得漏網。

七月，斬登萊巡撫孫元化。元化，蘇州嘉定人，慷慨好談兵。以乙科歷官寧前兵備。適海氛不靖，以元化知海事，超陞為登萊巡撫。大凌河告急，部議調孔有德等率兵防援。孔故毛文龍部將，因文龍之殺，原有二心。至是奉調往來海島，幾犯颶溺。比改而從陸，不勝怨咨。前隊已至吳橋，後隊尚滯新城。奪取王庄僕一雞，王氏大族，勢凌東省。隨稟領兵官必欲正法，領兵官不得已，查奪雞者穿箭遊營，衆大譁，遂殺守庄僕。報知前隊改轅而南。時統兵者左步營則叅將孔有德，右步營則都司陳有時。東

江副總兵毛承祿登州參將李九成，遼兵三千人，皆歎血立誓，擁德以叛，攻破城邑數處。距登數十里於馬塘店扎營，曰為王所逼，非敢叛也。元化令參將耿仲明傳諭扎營城外教場，候撫教場固有三千營房，援遼將率家屬居焉。欲令移入，出房以舍步兵。城中拒不納。孔說耿亦反，尚有遼人在城中者，紳民必欲搜戮之。遼人遂開門迎師，登城告陷。時壬申正月初三日也。元化始知被給誤事，抽刀自刎。為耿仲明救止。逼之具疏言狀，已復縱之航海歸。以二月抵津，就逮。問下鎮撫司打問，驗其自刎非偽。方下部議罪，而上遣侍郎劉宇烈督師。既許招撫，復誘新撫謝璉知府朱萬年并徐翟二內使殺之。事聞，上大怒，遂

斬元化當日城破被禍者有鎮臣張可大鄉官張瑤王象復舉人王與夔皆以盡節稱山東巡撫余大成亦以失事逮下獄論戍

孫余二撫既被逮後廷推以徐從治撫山東謝璉撫登萊俱同日受事賊已抵萊州二月至四月肉薄攻不捨晝夜贊畫主事張國臣原奉撫議以出援兵皆畏賊主者姑亦聽之以為撫事成則萊圍自解且以援為名耳三月之初國臣遣使入城議撫從治抗疏言其非中朝以為不然而賊攻圍益急四月十六日架西洋大砲礮擊西南城隅從治方簡閱丁壯指揮出戰左右請少避從治不可發語未畢而礮中顛顛身仆而絕矣從治既

死萊撫謝璉又為賊所誘殺師劉宇烈逮問下獄更調榆林各邊兵特用朱大典為巡撫以禦之至八月中方解圍有德竟自萊入海破朝鮮投誠於口矣

上召吏部尚書閔洪學兵部尚書張鳳翼諭曰吏部用人根本近聞選官動借京債到任便要還債這債出自何人身上定自剝民了怎得有好官肯愛百姓朕前日費幾許推敲纔用卿二人須革去舊弊為國家任事又召左都張延登諭曰風紀重任表率諸御史須是嚴加考核不可徇私又召吏科劉斯球河南道李日宣諭曰爾等以言為職若直言謹論朕甚樂聞如何動稱言路閉塞你們議論不管行得行不得只條陳一本塞責多

為卻情面賄賂成何言官斯球奏臣等有聞必告一毫不敢欺  
皇上上曰有聞必告是你心裡說出來的是你口裡說出來的  
你們有一疏定有一緣故與疏中所說之事不相關以後如有  
把持囑托行賄的發覺出來自有祖宗之法在又諭錦衣衛王  
世盛清理刑獄不許瞻徇又遍諭羣臣曰既做一官就有一官  
職掌件件都該打筭天下方能治平如何一事不做專圖個名  
色好聽嚴諭再三皆悚懼而退

先是有疏參論監視宣府太監王坤坤遂抗疏指修撰陳于  
泰發端謂于泰盜竊科名希建言之名為自固之術席首輔周  
延儒比暱之勢借端責備反飾醜狀果否內臣不識一字有類

沈同和之曳白云云是借于泰上侵首輔也首輔即自劾求罷  
不允廷臣交論不已左副都王志道因上內臣越職輔臣失職  
疏謂內臣論劾漸廣內則科道六曹外則方面督撫又內則卿  
貳今則糾輔臣矣國家設輔臣宮府黜陟皆其職掌內臣糾劾  
侵權而輔臣不問駸駸口啣天憲手持朝綱而輔臣尚不問將  
焉用彼相哉奉責詰責又召對於平臺謂志道曰遣用內臣原  
非不得已屢旨甚明昨王坤疏朕已責其誣妄乃廷臣舉劾莫不  
牽引內臣豈處分各官皆為內臣耶志道對曰王坤直劾輔臣  
舉朝皇皇為紀綱法度憂臣為法度惜非為諸臣但疏不能詳  
慎語多謬誤上曰在朕前便多謬誤書之史冊便不謬誤了國

家大計不言惟因內臣在鎮不利奸弊乃借王坤疏要挾朝廷誠巧倭也詰責者再周延儒曰志道非專論內臣實責臣等溺職上曰職掌不修沽名立論何堪法紀命削籍去

給事中陳贊化論周延儒招權納賄遊客李元功借叢威人延儒嘗語去輔李標曰工先允放余封還原疏即改留頗有回天之力今上義皇以上人也此是何語豈徒小人之輕洩乎且引刑科李世祺為證世祺奏延儒有是言詔勿問六月延儒予告回始溫體仁將奪其位王坤疏參周時體仁無一語相助於是贊化屢疏即義皇上人一語窮究不已體仁知上意已移凡與周為難者必陰助之而助周者皆黜周遂放歸

原評上饒以票示擬  
誤去非字於位也

烏程擠宜興去位宜興不堪乃謀召桐城何如寵以壓之桐城疏辭不允勉強就道中途復以病堅辭始蒙俞允烏程竭力邀首輔之稱不可得甲戌中秋閣臣例有賜饌大璫傳諭始稱首輔時烏程方在告病痊入直即開首輔之室以居之當宜興在事又荐用上饒鄭以偉上海徐光啟二人皆老成宿望也不久相繼告亡至是請枚卜上既點嘉善錢士升又特用巴縣王應熊香山何吾騶二人嘉善雖浙人與諸君子頗相周全唐世濟力言於烏程令收之無為他人用遂由南禮侍入巴縣亦宜興所注意而烏程援以自助者也命既下給事中章正宸疏糾應熊剛愎自用縱橫為習小才足以覆短小辨足以濟貧一旦大

用必且芟除異己驅鋤善良報復恩仇混淆毀譽且訛言何所不至謂是左右為緣故倚他途以進將使天下薰心捷足之途紛馳而起因自附於陽城裂麻之義有旨卑職逮問時正宸方以館職外授遂著蹇諤之聲云

諭吏部荐舉潛修之士科道不必專出考選館員須應先歷知推垂為法次年又命改部屬為科道於甲戌科以後遂停考庶吉士以行取俸滿推知考選改翰林編簡人因爭趨翰苑一途并不屑就科道而營謀者益甚至戊寅年之考有以相爭競而構難者矣

夏五月命司禮太監張其鑑等赴各倉全提督諸臣盤驗散放太監張應朝調南京與胡承詔協同守備

諭兵部流寇蔓延各路兵將功罪應有監紀特命太監陳大金閻思印謝文舉孫茂林為內中軍會各撫道分入曹文詔左良玉諸營尋復以閻思印同總兵張應昌合勦汾陽知縣費甲鏢以逼迫苦供億投井死六月命太監高起潛監視錦甯張國元監視山西石塘等路綜核兵餉命太監魏相監視登島兵餉順天巡撫按報三河知縣劉夢煒自縊死先是有解餉銀過本縣者被盜竊去三千餘兩奉旨責令本縣官賠補夢煒初任清苦憂懼無措遂於私衙自縊當時上司委官入衙相驗行囊蕭索合邑俱為之嘆息

刑部奏會官處決蘇有功即毛有功文龍營將陳降東被擒解京在檻車中飲酒放歌及旨下處決其夜自演象所逃去究其故乃解役每夜放出說書是夜忘收禁也  
癸酉秋決之日上素服坐建極殿與諸輔臣相商極其虛懷時溫體仁當國無所平反內有一人徐兆麟遼東人以舉人任陝西華陰知縣到任僅七日而城陷於賊上以此頗躊躇體仁無一言為之救解遂致之死人皆冤之

兵部主事賀王盛論烏程私其鄉人考試官丁進摘癸酉南闈黃美中後場奢閤娼刀青山綠樹語為關節青山綠樹出朱子心學詩人猶易知奢閤娼刀乃荀卿侘詩云閤娼子奢莫之媒

也娼母刀父是之喜也大畧是善惡顛倒之意上欲查究此四字閣中不能對委之部科大宗伯李騰芳屢費翻尋嚴旨以其不行糾駁令間住去已而部科共擬省直黜革舉人七名又罰科者數人各考官降調有差福建顏茂猷會試全作五經題外簾以為異知貢舉林鈺為之題請奉旨念其該博准錄送內簾主考不知上之屬意也置副榜第一出場亦具疏請之上命試錄中列在第一名之前准與廷試拔置第二甲第二名皆異數也

顏中天啟甲子鄉試亦全作五經監臨喬承詔以其越格令止錄本經進內為主考顧錫疇房考祁彪佳所拔其人故博

學篤行。為士林推重。登第後。授禮部主事。不久即故。或傳其為仙去云。是科場中皆推易一房。文公震孟所取。陳際泰為第一。同考項煜欲令會元出其門。計誘文公。謂渠所取乃楊廷樞也。楊為同鄉名。文遂讓之。及拆號。則李青也。項向有項黑之稱。一時遂笑傳有項黑得李青之號。自後以五經得雋者。又有丁丑揭重熙。癸未馮元颺。

殿試故事。內閣擬策問二條。請上點用其一。無所竄改。是科問知人安民。上更其大半。曰。所與共天下者。士大夫也。今士習不端。欲速見小。茲欲正士習。以復古道。何術而可。本屬地窄人少。一旦稱兵。而三韓不守。其故歟。目今三協關甯。以及登津

津等處。各宿重兵。防也。兵不可撤。餉不可減。今欲

恢疆。如何作用。且流寇久蔓。錢糧缺額。言者不體國計。每欲蠲減。民為邦本。朝廷豈不知之。豈不恤之。但欲飽軍。何道可能兩濟。即屯田鹽法。誠生財之源。屢經條議。申飭不見寔效。其何歟。至于漕糧為三軍續命。馬匹為戰陣急需。其折截掛欠。遂失原額。原制何道可復。今雖猖獗河套。有可復之機。邊外儘可作之事。但難于賊窺伺。朝野匱乏。近降。即至作何安插。揷套連合。作何問破。流賊漸逸。鄭廣海寇。時擾浙閩。勤減不速。民難未已。兼之水旱頻仍。直省多故。作何挽回。消弭。又唐宋曾以武臣為中書令。樞密使。文武似不甚分。我太祖曾

以直廳為布政典史為僉都今奈何牢不可破爾多士留心世  
務久矣其逐款條答無諱朕將親覽焉以上皆宸翰親揮語意  
淋漓求治之殷具可想見又故事讀卷官擬上卷十六卷硃圈  
句讀進呈御批定一甲三名今上命再呈十二卷無句讀者特  
拔劉理順為第一後殉甲第二吳國而以原擬第二者為第三  
申之難楊昌李擬第一者為二甲第一昌第三者為二甲第三陳組  
祚四卷皆嘉意造士之睿謨也御批

原評其後

給事中吳家周疏論溫體仁杜門兩月入闈典試不先不後有  
私壟斷而左右望之迹臣乃得以朝廷大典禮問之夫聖壽呼  
嵩元旦輯瑞體仁獨托病不出矣禘祭太廟春祀社稷亦托病

原評此則近於刻

不出矣經筵開講所以崇聖學獻俘太廟所以昭武功皆托病  
不出即皇太子千秋令節終托病如故獨至入場主試則褰裳  
就之無他朝賀係臣子恪恭之誼所關在朝廷取士有私門桃  
李之藉所利在身家也尤可異者會場題目歷來與君德政治  
相關未有大臣敢妄自稱比者今首題以子產自許不思鄭以  
衰國孱主有難乎其擬上者若救民於水火之中尤屬不倫堯  
舜在上雖小醜未靖何至比吾民於殷喪之季况取殘吊伐亦  
不宜談于今日奉旨以其詆誣牽引着降調先是易一房漆嘉  
祉首篇末有不敬不義之臣云云本房文長洲取之意烏程必  
見駁當有一番質辨及呈卷即批允比撒棘烏程于閣中揚言

曰、外人說我們要進場取門生、今日地位也靠不着門生了、况場中即有人罵我、嘉善曰、場中如何罵得、烏程曰、他文章竟說不敬之人如何、不義之臣如何、豈不是罵、嘉善曰、如何打發他、烏程曰、本房批、伸眉抗手、想見其人、敢不中耶、是科烏程雖為主考、力行阻抑、榜額每科三百五十名、止取三百、會元多扶入鼎甲、而李青不得入、每科考館、獨是後兩科不考、至倡議欲令三甲選縣佐貳、衆論以為不可而止、

以總理太監張彝憲請命天下朝覲官、將會計冊親賚投送、查其完欠、以為殿最、仍照見部堂體行禮、禮部郎中袁繼咸已陞山西提學、將出京、上疏言、士有廉恥、然後有風俗、有氣節、然後

有事功、如總理內臣有覲官賚冊之令、皇上從之、特以別釐奸弊、非欲羣臣屈膝也、乃上意一出、靡然從風、藩臬守令、參謁屏息、得免苛責為幸、嗟乎、一人輯瑞、萬國朝宗、諸臣未覲天子之先、拜內臣之座、尚得有廉恥乎、逆璫方張時、義子乾兒、昏夜拜伏、自以為羞、今且白晝公庭、恬不知怪、國家自有覲典、二百餘年、未有此事、可為太息也、上以越職言事責之、彝憲亦疏言、覲官參謁、乃尊朝廷、繼咸復上疏言、尊朝廷自有典例、知府見藩臬行屬禮、典例也、見內臣而行屬禮、亦典例乎、諸司至京投冊吏部、典例也、先謁內臣、亦典例乎、事本典例、雖坐罪、猶以為安、事創彝憲、即長揖、祇增其辱、高皇帝立法、內臣不得與外事、若

必以內臣繩外臣。此會典所不載。上切責之。時有大同知府蔡屏周持册投進。獨長揖而退。內臣呼而語之曰。此朝廷命誰敢抗。蔡答曰。朝廷止命查錢糧。不命查體統。彛憲默然。蔡亦不顧。後借他事參論。公論不平。隨有以大府薦者。上亦不允而罷。夫天下之為郡縣者多矣。抗節不屈。止蔡一人。且又出於乙榜。其丰骨挺出。真超出尋常矣。

刑科給事中李世祺。以劾大學士溫體仁。吳宗達。謫于外。復罪。文選郎中吳鳴虞。以考選非人。并謫之。袁繼咸復言曰。養鳳欲鳴。養鷹欲擊。今鳴而箝其舌。擊而絀其羽。朝廷之於言官。何以異此。今考選在即。銓臣必將徧問諸臣曰。汝必不參大臣。然後

授之臺諫。將使言官括囊無咎。為大臣者終無一人議其後。大臣所甚利。忠臣所甚憂也。且皇上樂聽者。謹言。使天下誤以攻擊貴近為皇上所厭聞。其勢將波靡不止。上以越職言事罪之。先召舊輔。何如。罷入朝。屢引疾不到。給事中黃紹杰奏言。從來君子小人不能並立。如寵徘徊瞻顧。則次輔體仁當知所以自處矣。自體仁在位。水旱洊臻。盜賊滿路。燮理固如是乎。秉政既久。窺旨必熟。諸臣奉承其意。用一人則曰。此與體仁不合也。行一事則曰。此體仁所不樂也。凡此皆召變之由。乞命體仁引咎辭位。以回天心。慰民望。上責其率妄。命降調。體仁疏辨。紹杰復連三疏劾之。其言愈厲。且曰。體仁奸欺。其說不過兩端。一曰朋

黨一曰票擬下而朋黨一語可以箝言官之口挑善類之禍上而票擬一語可以激聖明之怒蓋債悞之愆又疏劾佐銓張捷薦用逆璫中人八年二月又疏劾體仁悞國禍延陵寢再奉旨降雜職用

總憲冢宰俱缺上命公舉堪者來看特御平臺召五府六部九卿科道面諭曰吏部尚書乃用人的官須要第一等才品若據會推故套不過精心定力兩語混題止須一二人把持足矣何名會推卿等各舉所知來吏科盧兆龍奏科道例無保荐只舉有不當方行糾參上深然之吏部侍郎張捷奏年來諸臣黨同伐異在外會推自然瞻顧情面孰敢犯忌今皇上面諭各舉所

知務得天下第一等才品須不論方隅上曰立賢不以方卿等奏來時定國公徐允禎等大學士溫體仁等共舉謝陞唐世濟等十餘人張捷獨舉呂純如唐世濟諸臣舉訖捷奏臣舉二人皆舉朝所不欲用者上隨取疏閱訖諭曰呂純如是逆案有名者為何舉他捷奏純如臣所深知逆案列名為其頌美逆賢今紅本現在並無一字相及豈可誣坐上曰他已曾辨過但不可開端因以目視科道曰如何說盧兆龍奏諸臣荐舉各有本末至張捷所舉呂純如欽案有名臣等正擬糾舉適聆聖諭已明故不敢復奏捷又奏臣寔知純如真清執可用故從公推舉即在案中亦須分別倘用之不效甘與同罪又言小民作奸犯科

朝廷五年大審。每年熟審。惟恐其寃。何況大臣。如何寃得。工科孫晉即奏。此是如何。比擬今日。皇上鄭重冢臣。特召諸臣。公同咨訪。乃以開釋罪囚。相喻乎。兆龍奏。臣任清江知縣時。記得純如護送惠藩之國。沿途騷擾。即此已見。無才。况屈身逆賢。其品可知。時科道蔣德瑗。金光宸。韓一光。楊繩武。俱奏。純如斷不可用。捷猶嗷嗷不休。刑科姜應甲叱之曰。張捷所舉如此。心事可知。還敢在皇上前巧辨。上即令捷下去。隨諭首輔溫體仁曰。謝陞可。明日旨下。以南吏部尚書謝陞為吏部尚書。南右都唐世濟為左都御史。時八月二十一日也。時王應熊故善純如。又與體仁相比。故體仁陰主之。而令發自張捷。不虞上之堅持也。給

事吳甘來范淑泰。交章劾應熊捷。同謀黨附。冀翻逆案。上不聽。捷亦屢疏乞休。特體仁奧援。俱邀溫旨。十二月間。已奉佐計。方殷之旨。正擬肆其亮鋒。未幾有劉宗祥之疏。宗祥先任金壇知縣。與捷相善也。以御史巡按四川。成都知縣賀儒修者。捷之姻戚。因作東托宗祥。欲得卓異一舉。東中有忠言不入朝事。日乖之語。宗祥入川。見儒修狼籍特甚。折于公論。循例糾劾。有旨革職。逮問捷大恨之。值宗祥回道。考核捷一力把持。擬加重譴。宗祥據寔剖辨。且以捷手書上聞。捷遂革職下獄。都察院擬宗祥降三級調外任。上抹去之。御批劉宗祥着回道管事。後部議捷配贖。

張捷在天啟初官御史疏論三案即與諸正人有忤癸亥例轉外藩乙丑同前例轉數人皆陞京堂以其不附東林也時逆璫柄政同事附之者皆稱功頌德殺人媚人捷獨介然自持不苟阿附且周旋周忠毅公于詔獄友誼甚篤彼黨偵知之竟出中旨指為阿附黨人為李某死友着削奪為民蓋誤以周公為先公也是其人可謂中立不倚之君子也至是又尤堅執邪議方疏請追卹諸逆臣重刊要典頒行天下而國已亡矣國亡之日卻能不降不逃潔身自盡同鄉之人亦稱其居家孝友律已清廉則蓋棺定論大義皎然獨惜其意見之偏為邪氛所中深不可解至不惜甘與同污也使死而有知推原誤國何人正邪何辨此時水落石出亦自悔其生前之持論否

文震孟請改修寔錄疏畧云臣因纂修熹廟實錄從閣中恭請光廟實錄較對見其間乖誤甚多如先帝冊立及挺擊紅丸諸大事皆祖三朝要典邪說而應和之蓋天啟三年七月實錄進呈禮臣周炳謨等所纂修閣臣葉向高韓爌等所總裁者也天啟六年逆黨崔呈秀等謂實錄非實請旨重修則崇禎元年二月所進今皇史宬之所藏者是時皇上初登大寶要典未燬逆案未成閣臣黃立極等不行奏明含糊從事凡光考二十年

青宮之憂患與夫一月天子萬年聖人等事俱隱而不彰斯固  
臣子所痛心也摘其悖謬宜改正者五事上聞嘉善票擬要典  
已燬是非已明據奏皇考實錄是否與要典同異并天啟三年  
所進該部逐一查議具覆時八月十三日也票入不發直至九  
月二十七日上御平臺手出此疏面諭輔臣曰皇考潛德青宮  
三十年憂勤惕厲靡有甯晷雖長幼固有定分皇祖意無偏向  
然儲貳大事諸臣上疏催請自有職掌如何說他浮議說他好  
事溫體仁奏無嫡立長皇祖屢旨申明諸臣不行靜聽屢疏擾  
瀆反致大典久稽寔諸臣之罪上曰雖如此說催請之疏自不  
可少又如張差持挺闖入東宮此何等大變王之案揭稱其不

類瘋癲請集多官會審正是他敬慎處如何反說他謀捏王應  
熊奏之案原係官箴有玷知不能免故捏此一段以圖自全上  
曰張差直至殿簷韓本用聚眾擒拿可是之案捏造的後多官  
會審張差歷歷口供是瘋癲不是瘋癲體仁奏之案此揭原不  
差但其本意欲借此以自免上曰皇上病亟時李可灼輕進紅  
丸以致賓天諸臣還是付之不問的是還是據法執奏的是應  
應熊奏可灼本意原欲皇考速愈因皇考久病之後一時挽回  
不轉上曰君父有疾豈是臣子可以嘗試邀功的當時諸臣不  
行執奏已自差了反說執奏者不是有此理否體仁奏此皆是  
逆璫羣小附會造為此論今要典已焚是非已明又屢奉皇上

申飭便可垂示萬古。上乃將此疏付閣臣改票二十九日奉旨。朋立大典。皇祖淵衷。默定外庭。未知故屢有瀆請。然諸臣羽翼國本。忠自難泯。張差實係瘋癲。雖無別情。然挺擊異變。法應重究。紅丸輕進。諸臣無執奏。殊欠敬慎。但其意亦忠愛。諭旨明申。即為定案。寔錄不必議改。該部知道。巴縣所票也。同時許士柔亦有系不可畧考。詳補牘兩疏。繼文疏執爭之。文疏請刑定改錄所筆者。許疏則摘抉改錄所削者。俱奉不必煩議之旨。雖有正論無救。邪說皆由閣臣護奸也。安得有信史哉。

自己已之警。所謂援兵以糧不給。脫巾一呼。中原遊民又以驛遞裁減。無所得食。皆挺而走險。潰兵與飢民合。而流賊起。秦

晉二省無處非賊。始調總兵曹文詔專勦山西之賊。所殺獲頗多。可以奏功。未免有自矜之意。既而賊勢漸張。時有小挫。因復調宣大兵勦之。賊復趨秦中。總督楊鶴以無功被逮。陞洪承疇代之。洪能撫綏得軍心。勦賊頗著績。于是賊復渡河入晉。晉撫許鼎臣不能禦賊。南走河南。遂闖入鄖陽。撫治蔣允儀以兵力單寡。連疏叩閣。時烏程柄國。修郅構之被逮。賊遂蹂躪荆襄。直入四川矣。

按鄖陽原以村鎮改縣治。以其介湖陝河南三省之交。山川綿亘。盜賊易起。故設重臣鎮撫之。又以撫綏流民。故易巡撫為撫治。然所轄地方。各省自有巡撫主之。治臺不能專也。萬

曆初年額餉猶有一萬六千。王世貞在事以六千改充遼餉以四千發荆商兩道自備標兵而數止六千矣。標兵三百歲糧止十兩有奇。皆各縣有身家者買頂首以免門戶而覓人充當。又義勇二百歲糧六兩且餬口不足而南下之賊動數十萬。雖使武侯復生亦安能肆其堵禦哉。蔣公在事屢有疏痛切言之。閣部俱不相炤管。宜其得罪也。代蔣者為盧公象昇。幸以才名素著。不數月即陞總理。此後則俱無善全者也。流賊初入荆襄。廷議設五省總督。時有添設少司馬原以備總督之選。彭汝楠汪慶百二人不願行。烏程力庇之。遂置總督不設。至賊勢燎原。始以陳奇瑜為之。專任勦賊。賊潰入四川。悞涉

棧道。南北以兵堵塞路口。可束手就斃矣。賊首乃求撫密遣人賄奇瑜。奇瑜利其賄。許之。代為上疏。准其自新。押回原籍。每十人以一安撫官押送。及出險口。至草涼樓地方。一夜衆賊盡縛。諸安撫官或殺或割耳。或委諸道旁。復大肆猖獗。奇瑜以撫局大壞。因請各撫鎮分地責成。欲假此以分過也。奉旨。總督原以調度各鎮撫道。不得藉口分任。弛却取罪。旋草職建問。以烏程程之庇。僅得遣戍。時秦賊數十萬出關。分為三。一自陝州上平陽入晉。一自武關向襄陽入楚。一自盧氏東向。分犯河南河北。河南北諸賊復分為三。一走伊汝。陷滎汜。東北入鄭州。復分道犯商州。一自葉蔡南圍汝甯。一自懷慶東渡河。掠歸德。睢汝

陳許等州其襄陽賊與汝甯賊合十五營衆數十萬由固始薄霍丘破之焚壽州正陽鎮破潁州知州尹夢鰲通判趙士寬始闔門死鄉紳兵部尚書張鶴鳴年八十餘矣賊執而倒懸諸樹引滿射之逼索金帛有賊至持刃劈之自踵至頂且罵曰若復能坐而鞭吾輩耶人始知其總督時有宿憾者也時各邑鄉紳死難者不能詳記

鶴鳴天啟初任中樞左袒遼撫王化貞與經略熊廷弼構難致有遼陽之陷又起奸細一獄為卸罪移禍地經撫既皆得罪言路攻之僅能免官幸矣逆奄用事黃緣起南司空黔賊未平逆案李夔龍荐之逆奄于朝堂大言曰黔事非鶴鳴不

辦雖老可用也遂改兵部尚書督川湖雲貴軍務賜蟒玉尚方聞其所以獻媚逆奄者至醜穢不可道崇禎初為言路瞿式耜胡永順輩論其剋餉冒功與媚奄諸罪削職家居至是年已八十餘矣熊王皆相繼正法西市彼獨老而不死安享富貴乃竟戕于流賊之手慘毒加甚誰謂天道無知乎然繼鶴鳴督雲貴為朱爕元又言因其遺略得平安氏蓋其人大略有才而忤貪而鄙用為督撫或可收效一隅用之中樞則不免貽害國事矣

八年六月十六日賊自潁州至陷鳳陽焚皇陵享殿其明樓鍾簾皆燼毀高墻放罪宗執知府顏容暄杖殺之留守朱國相指

揮包文達俱力戰不屈死軍民死者凡四千三十五人見給

正亨查報疏

賊自稱古元真龍皇帝掠陵監所遺響手小奄縱酒奏

伎剗孕婦注嬰兒于槩以笑樂者凡三日

鳳陽向未有賊守備太監楊澤貪殘苛刻商民苦之巡按吳振  
纓至商民往愬振纓大懼太監不肯受詞閉門以拒商民集其  
門者三日日益以衆遂執澤用事武弁侯定國殺之一擁入太  
監署吳亦乘間走矣衆遂焚太監署劫掠城中亂民無主乃集  
隊執香往迎流賊蓋土人之亂十五日先發郡寇以十六日始  
到激變釀禍實起澤與振纓撫臣楊一鵬不能弭治又以隱匿  
遲報俱奉旨拏問下鎮撫司一鵬為輔臣王應熊座師振纓則

溫體仁兒女姻也兩輔臣力庇之上以皇陵失事重大竟從嚴  
處一鵬以決不待時棄市振纓發口外充軍然起變時楊實在  
數百里外吳現在鳳陽因亂而逃乃輕重若此蓋以烏程之庇  
云

文秉曰烏程為吳故祈哀大璫至於屈膝閣體真掃地矣

先是賊臣河南將逼安慶有為樞臣張鳳翼言者鳳翼語科臣  
孫晉曰賊走南已入絕地此賊不食大米賊馬不食稻草行自  
斃矣聞者無不掩口竟不預為設防卒致有鳳陽之變

上以陵寢之變痛憤避殿御青布袍下詔罪已命大小臣工共  
加修省詔曰朕倚任非人遂至□猖寇起以全盛之天下若肯

寔心為國，何難滅此朝食。奈夸詐日聞，寔功鮮覩。□三次入邊，寇七年不滅。國帑匱乏，而征調未已。閭閻凋敝，而加派難施。中夜思維，不勝憤惋。乃至今年正月，上干皇陵。祖恫民仇，責寔在朕。茲擇十月初三日，避居武英殿，減膳撤樂，以青袍視事。示與行間士卒甘苦相同之意。馳諭督撫，遍告行間，仰體朕心，共救民命。署禮部侍郎陳子壯，因條議寬寔政，蠲租清獄赦罪，使過省工，束兵豁贖。卹宗改折寬驛，旌叙事例，凡十二款。內請復祖制，盡撤內監，則不利於諸奄。議束兵責督撫，則不利於諸鎮。政府持之，欲狹小其事，徒事虛文彌飾。於是雖有主上勤恤美意，寔政終不能下究也。

寬卹詔下，議及罪譴諸臣。嘉善謂刑部宜具各招情節，列名疏請先釋罪，而後起廢。方有次第。冢宰謝陞曰：此敝衙門職掌，疏不可緩。疏上，臚列無遺。并當日得罪情形，悉為粉飾。上大怒，切責下選郎吳羽文於獄。而事不可為已。及覆請一百員，票擬僅僅以楊都楊世芳、余文燭、馬思理、高倬、劉必達、章正宸、胡良知、楊弘、廖大亨、張燦垣十一人了局。皆烏程一手握定。使寬卹德意，竟成屯膏。其忤如此。

給事中許譽卿疏論輔臣。樞臣云：民家丘壠偶傷，亦必飲痛。今仰惟至尊之痛恨，皆樞臣固位失事。輔臣玩寇速禍耳。賊在秦晉，議設總督。侍郎彭汝楠規避不行。樞臣則謂人曰：政府不肯

設也。賊入豫楚，汝楠被論，再議設督，而汪慶百猶汝楠也。乃推極邊之陳奇瑜，又悞於撫之一說，心持兩端，而賊已蹂躪東南矣。昨冬東南震驚，始有淮撫操江移鎮之疏，及旨下，又曰：不必議移，以滋煩擾。輔臣遂視寢陵為孤注也。又疏曰：論輔臣者皆庇私納賄，一身一家之事，其於悞國猶小。獨此皇陵震驚，祖宗怨恫，致聖心有在天之隱痛，臣誼有率土之公憤。此之悞國更孰有大焉者？前後連上五疏，皆極其痛切。同時科道又有何楷、范淑泰、徐耀、吳履中、張盛美、張肯堂、郭維經、部臣則賀王盛、胡江、鄭尔悅等相繼抗章，不下數疏，而體仁悉以門戶坐之。於是聖聰終為所蔽矣。

總河劉綎嗣革職提問時，以駱馬河潰淤，創挽黃之議，起宿至徐，分黃水通漕運，計工二百餘里，費金錢五十萬。其鑿河處，卽州上下悉黃河故道，淤土尺餘，其下皆沙。每挑濬成河，經宿沙、落河坎，復平，不可以舟。劉遂得罪入獄，坐贓，父子俱死於獄。人皆惜之。郎中吳璉分工獨多，亦引監守律坐死。庚辰秋，以魏景琦監決之悞，竟致典刑，人尤冤之。

劉公，北直曲周人，丙辰進士，與先忠毅同年相好也。工書善詩，好交游，頗以經濟自任。其門下多游客，未免失於輕信。東光霍維華者，以逆案遣戍徐州，冀立功贖罪。前議寔倡於彼也。劉方好奇略，遽信之，致罹大禍。小人之不可作緣如此。

禮部署部侍郎陳子壯請寬釋河南巡按盧經學道胡澥不聽。先是汴城萊陽王與許州貢生蘇輔宸爭田，屢具詞，有司不能聽。適學道考試開封，萊陽家奴擒蘇族一秀才至家，歐之。此生原不與輔宸事，諸生成為不平，先訴之胡。繼訴於盧，時三月十五日，三司公謁按臺，萊陽王仝八王子亦昇一人來訴，以期抵塞在院門外大噪，以輿扛亂打諸生，有飛石相擊者，諸生不敢動，噪乃愈甚。萊陽復在門首裂其衣冠，嚼血塗面，為圖賴計。院道出示，歸咎諸生，明日傳蘇生已死，王亦稱被歐傷，令其母訴按道。又膚懇于周王，周王即據偏詞入告。及按臣疏聞，上疑萊陽實被辱，地方官私庇諸生，嚴旨遣緹騎逮按道及蘇輔宸等。

等下錦衣獄。蓋上方崇重藩體，故經藩王疏參者，必行重處。時盧胡俱到任，方兩月，竟得嚴譴。蘇生竟死獄中，人皆冤之。上以兩國學之士，襍而多端，無以甄才品，施教化，乃停止入貲，援例一途，命各提學官彙試各學廩膳生員，每學拔取一人充貢入國學，以巡按為監臨，道臣為提調，分試兩場，有分考有謄錄，彌封等官，一如鄉試法行之。貢入禮部，廷試闕下，分送兩雍肄業。一時與貢者俱自誇為奇遇，然亦未嘗特拔一人進用也。次年又命頒孝經，暨朱子小學於學宮，令士子誦習。督學官取以命題試士，又命士子兼習騎射於文試畢後，又試馬步弓箭。鄉會場亦於榜後試之，一時不能文者，競以此為媒進之階矣。

諭監修寔錄等官。朕躬閱皇考前錄，頗有失寔之處。蓋特政予奪，或志在激揚矯抑，不得驟言得失。即章疏敷陳，亦有風聞臆見，難保盡出公確。惟略存當日始末，備載所奉明旨，一聽後來評繹。庶幾初意不——晦。今于意合者存其美，不全者去其寔。或突載一節，或單標數語，成心偏見，滋惑傳疑。其於寔之義何在。目今皇兄之錄未竣，應加申諭。又諭：今士鮮實行，人多虛飾。其於荐獎乞恩，尤甚。以目擊耳聞之事，輒要欺人，以說鬼說夢之言，敢於奏上，才難自古記之。何近時之多賢耶？賢人多而天下治，何宇宙之多故耶？祇足貽譏後世。見笑識者，亦當禁之。二條皆御筆親撰，此即漢詔之佳者，不能幾及。後經閣擬反不如矣。

故事，經筵講書，置春秋弗講。上獨以春秋有關於撥亂反正傳旨，令選專經者進講。時首輔溫故以春秋起家，詞臣文震孟亦以春秋著名。首輔恐文進講必如前年有諷諫，或當上意，故隱之，而佯為搜索狀。次輔嘉善指及之，首輔佯驚，謂幾失其人，即以名進。十月二十四日，講至祭伯傳，而宰亶歸，賵傳賵凶禮也。當缺不進講，上特令補進文，乃講亶以六卿之長而壞法亂紀，自王朝始焉。用彼相上領之，既奉御筆宣諭云：宰亶一章，正見當時朝政之失，所以當講。後以此類推，已又講內君子外小人，及人臣義無私交一段，大愜上意。爰立之命，基于此矣。

八年六月二十九日，上傳大小九卿詹翰等官召對上御門，天

兩傍置桌子筆硯諸臣行禮畢上諭曰諸臣才品朕未遍知今  
一試票擬輔臣六部尚書站於階上其餘分班試于階下兩中  
官持本一帙各分一本并二小東傳諭將內本票擬書東內一  
藁一騰試完命退次日上傳姜逢元陳子壯文震孟張至發蔡  
奕琛閔仲儼馬之驥張元佐張居着吏部將履歷年貌開寫來  
看其在籍諸臣有堪任閣員者也着從公推幾員來吏部即將  
九臣年歷開寫會推在籍吏部侍郎林鈺禮部尚書孫慎行順  
天府尹劉宗周奉旨召在籍三臣作速來京尔部馬上催他就  
道不得遲延至二十六日奉旨文震孟張至發俱陞禮部侍郎  
入閣辦事先是召對文以病在告不與官尚為少詹事張以刑

部改入皆新政云自此以後凡敕下閣臣必內外兼用亦不論  
官階大小矣召起三臣孫以病卒于途未及陞見林以原官  
入閣卒於位劉陞工部侍郎不久以建言去

故事新參入直後以名帖及禮帖致掌司禮大璫亦來答  
時大璫曹化淳係王安名下素附正人托安之姪中書某轉  
致許公霞城盛稱曹皈依之意且云舊例固不可失相通一  
番此後有事亦可相聞好於上前說話許轉述之文公曰無  
論素不善與若輩往來且同事者方虎視眈眈若稍有一隙  
必反與以口寔何以自解卒不與相通未兩月頓失帝眷而見  
逐矣許公曾為予述其事深服文公之持正而嘆當時揆地

之難居如此

撤回各鎮監內臣諭戶兵工三部略曰朕御極之初撤還內臣一應事悉以委之諸臣不意習尚久非營私卸過甚有從而剝削為陞官肥家計者此士大夫負國家也不得已查焯成祖監視之例分遣各鎮添兩部總理亦欲諸臣自艾數年來經制稍立錢糧稍清諸臣亦有省于其中矣今將總理監視酌量撤回以信朕之初心惟關甯逼邊高起潛兼監兩鎮京營原有內臣提督焯常內而部司外而撫按務要共濟時艱慎始保終永識朕言是諭適在文入閣後一日於是遂有新參居功之說諧於上前矣

輔臣王應熊回籍先是六月初十科臣何楷以皇陵失事參溫體仁應熊庇撫按楊吳之罪應熊即於十三日具疏奏辨時何疏尚未奉旨發抄應熊又方註籍不入閣也何因以預洩機密參之應熊疏認謂家人在直房中抄出上乃下其家人于錦衣衛獄究問并查擅與中書姓名在直者俱罰俸一年家人王心良發邊衛充軍應熊遂以是去蓋上意既重漏洩烏程又適被論註籍不能為庇說者謂長洲寔為之而忌者益耽之矣

吏部尚書謝陞疏參工科許譽卿福建布政司申紹芳營謀陞官許削職申逮問許在天啟時以疏參逆奄謫官時謝為文選郎亦以不附奄罷崇禎初同膺環召謝已歷官冢宰而許在垣

中資望最深猶守故官以母老欲乞南太常以便養同人不可  
文擬留之陞太常少卿亦非僭分謝與首輔故難之適臺省同  
時攻冢宰及總憲許謂須舍謝而專攻唐二與烏程朋比肆惡  
尤不可緩也御史張績曾不通商確特疏獨參謝一人張固同  
鄉謝乃疑此疏出文許意又山東布政勞永嘉營陞登萊巡撫  
勞固逆案漏網諸臺省擬合力攻之謝三過戶科宋學顯曲致  
殷勤求稍徐之候旨下而攻之未晚且云勞君之座即申君之  
座也申故文之姻戚時任福建右轄待次蓋以此相挾而臺省  
不能待文章連續有旨登撫另推東省諸人又懷恨矣兵科宋  
之普力愆謝謂文許決不相容將以銓席待南冢鄭三俊及

大司農侯恂豈能久留汝耶謝已心動適有張之疏遂具疏參  
許與申坐以爭官講缺有憑藉輿援語發票時首輔已定意故  
示商確於同官嘉善謂所奏必當有據宜行勘或令回奏首輔  
不然遽票旨云大干法紀着降調夫既云大干法紀則不僅降  
調矣次日果發票削籍為民文爭之不得乃作色曰科道削籍  
乃極榮之事許陞辭疏復侵首輔首輔疏辨遂及文何二輔即  
為民極榮語曰皇上所以鼓勵天下者止此爵祿位號而震孟  
所言是以股肱心膂之臣為悖倫滅法之語疏入上頗怒得旨  
吾駟震孟不宜徇私撓亂各具疏引罪何致仕文間住未數日  
復以滅倫二字參庶吉士鄭鄴以鄴為文同鄉同年相善逆賢

時同以建言謫官故借以引繩批根也鄧居鄉寔有穢行謂可  
以箝諸正大之口鄧下刑部獄屢問屢駁同鄉亦不直之竟以  
士民公疏再下錦衣衛遂致極典而一時株連者甚多總由溫  
之險心毒手構成大禍云

河南監紀推官湯開遠由乙科以知兵授是官於五年冬已有  
兩疏論時事至是復疏言為皇上分任勦寇莫如撫鎮乃于撫  
則用懲創于鎮則用優遇諸臣受事之始已為不終朝之計有  
甯甘褫革必不肯做者以做亦罪不做亦罪也不做罪輕做罪  
重也即有肯者而反為不肯做者掣肘也有旨責其妄言做亦  
罪等語何所指着回奏因復奏言皇上為辨寇而誅督臣一逮

督臣撫臣二褫撫臣二并逮兩按臣道府州縣不可勝紀前後  
諸帥有一逮且誅者乎即以中州言之按臣曾倜捐貲濟荒未  
嘗悠忽竟從逮配將來無肯做敢做之按臣矣祝萬齡拮据兵  
兵食親率兵馳救武安遽行削籍無肯做敢做之道臣矣史洪  
謨令宜陽寇無敢薄城六安州之全獨力為多竟以罪擯無肯  
做敢做之州縣矣永甯鄉紳張論捐金募兵其子鼎延乞卹並  
其職無肯做敢做之鄉紳矣又如銓司敝數吳羽文竭力搜剔  
乃以起廢干怒竟致長繫無肯做敢做之部曹矣皇上不留意  
分別一下銓司即議罰議降革一下法司即議杖議遣配有肯  
執奏為不當者乎竊見累諸臣賢者不復以逮為辱不肖者

無復有自奮艾之心且以狂狷藏身人品與封疆兩盡可不為寒心哉奉旨革職拏問河南巡按金光宸為之代請以其戮力行間殺賊有功准釋放還職


上以祖訓凡郡王子孫有文武才能堪任用者宗人府具以名聞朝廷考驗授以官職其遷除如常名曰換授署禮部陳子壯疏言宗秩換授適開僥倖之門其事有不便者三不可行者五上怒甚有非祖間親之旨遂下陳于刑部擬贖徒放歸先已有宗藩儀節之議始于唐王上疏部議屢上屢駁至是上益怒欲加廷杖曹璫跪諫乃止未幾唐王杖殺二郡王上不憚又因邊警請統兵勤王上遂密敕撫按押發鳳陽高墻至十七年以淮

撫路振飛疏保赦出乙酉南都失守鄭鴻逵等擁至閩中登大位號隆武閩破被執蒙塵宗室以科目起家始自天啟辛酉其能文者江右為最楚蜀次之甯藩宗室有朱統鈔中辛酉戊辰兩榜選庶常有言宗室不便入館者改中書即告假去至宜興當國閔洪學秉銓以其疏請改館職壬午為南畿副考又有甲戌進士朱寶符賜名統鏗朱鉞賜名奉鈿皆庶宗未請名祿者中式後賜名皆出特旨庚辰年又有朝覲縣令朱露上疏逢迎時事召對授給事中賜名統鏘此其最著者自換授法行皆是親王保舉優者得中書次則府佐州縣官諸宗在仕途者幾八十矣大都以營謀得之換授易而科目難使諸宗不務讀書

專務鑽刺及入仕途益多不法公私苦之

乙亥十二月二十六日賊犯和州知州黎弘業嬰城固守二十  
八日賊用梯攻城城上發砲擊殺數百人賊復頂方桌掘城城  
上擲薪燒之已而風雪漸急城上人不能支有散走者賊遂得  
蟻附而登黎時有母隨任知事不可為視其母自縊訖大書于  
壁曰為臣不負君為官不負民忠孝誠已盡死生安足論書畢  
自縊而死一門死者十有餘人有幼子以先隨母還家得免同  
死者又有學正康正諫鄉紳侍御馬如蛟事聞黎贈光祿寺卿  
賜祭賜塋廕子餘各贈卹有差

黎公廣東順德人天啟辛酉舉人先忠毅時以南康推官應  
聘分考本房共得士七人黎公其一也工詩善書淹博風雅  
時稱名士尤篤於氣誼所以周視師門者甚至乃竟與先忠  
毅同以節義傳真無愧及門矣



Blank manuscript page with vertical columns for writing.

